

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 30 1958

T 3140/714.33

歷城縣志卷第三十七



列傳三

明

李思迪濟南人登元進士第為國子助教洪武元年以
故官入京授起居注六遷至山西行省叅政以事降丹
徒知縣坐失入人罪安置閩中十二年正月帝敕中書
曰思迪為縣無貪墨其守可嘉偶為姦吏所欺致失入
人罪竄居炎方已數年矣可特詔還俾訓國子三月乙
未帝延諸儒臣賜坐便殿論治道思迪及馬懿絨默不
語帝諭國子監師生曰李思迪馬懿朕以其學者日召

同遊期在嘉言善行啟朕未明而輔朕不足乃終日無
 講說經史者因而問及不過就他人之辭以對
 豈朕昏昧不足與聞耶抑朕之禮未至耶何訪之以道
 而不相告也及遣侍東宮欲其發明古先王之道匡弼
 輔贊以成其德器而緘默無異事朕之時其懷詐甚矣
 諭爾等自今為師者必盡其師之職學者必盡其學之
 道勿如思迪等之為也後思迪官至尚書

據明太祖實錄及廣東通志

按廣東通志李思迪洪武四年謫瓊山知縣以廉
 謹聞時芳草創凡所規畫皆中度革姦貪毀淫祠

祛宿弊芟繁冗政聲大著公餘輒歌詠自號海濱
 子因以名集官至尚書其所載歷官起居注山西
 叅政與實錄同而實錄云安置閩中此云謫瓊山
 知縣不知孰是抑先閩而後嶺南耶志云官尚書
 亦不見於實錄明史七卿年表亦無之

按宋濂集有送李思迪之官序畧曰晉王開國太
 原詔簡在廷之臣以吏部侍郎李君為之傳命既
 下為士者曰我知李君文且賢也翩翩乎修辭截
 截乎雅韻春花明而秋雲敷江濤雄而蛟龍鳴出
 其緒餘克擢高第遂為甲午科名進士其膺是選

也則宜在位者曰我聞李君賢且能也自來京師
即膺寵眷居右史有獻替之功佐延安有撫綏之
績已而召入郎曹直躋法從試之也既屢而用之
也彌篤其膺是選也則宜金華宋濂則曰是固然
矣然而皇上之意以晉國表裏河山之固北控代
朔南接關陝必得重厚誠慤君子輔王而安輯之
此李君所以在選要不止前二者所云而已也李
君名吉其字曰思迪濟南人據此則思迪名吉而
實錄及諸書俱作李思迪其以字行耶

潘原英山東歷城人洪武初任太原縣知縣改築城池

重葺廟學雅善課士當兵戈凋殘之際興賢育才絃誦

不輟祀名宦

山西通志

秦琰字居敬洪武二十六年領鄉薦累官刑部侍郎以

才行譽重一時

陸通志

周郁濟南人洪武三十一年任襄陵縣知縣持身嚴潔
為政寬宏均賦役平獄訟民爭德之祀名宦永樂間擢
渾源知州時旱蝗郁齋沐虔禱蝗飛出境川南有虎傷
人郁牒於神是夜虎果入籠中後陞荊州知府所在民
有餘思

山西通志

按周郁宦蹟兩見於山西通志蓋從襄陵渾源二

志采之也今合為一傳而舊志不載其姓名不識果為縣人否

張思信有勇畧建文二年靖難師圍濟南築隄壅水灌城中思信應叅政鐵鉉募關陘之潰其隄水泄城賴以全孫鸞正德六年舉人授長沙通判多異政民為立生祠鸞子錦太學生德府引禮舍人錦子潭見儒林傳據殷

士儋三山先生墓表

趙時中歷城人永樂間知南安府為政廉勤勞於撫字名聞隣境明一統志

按明一統志不言歷城人而白潢西江志引之如此

此

趙紳永樂九年舉人初授監察御史激揚有聲劾尚書金連出為揚州府同知後陞山西叅議轉江西皆卓然有政績以老致仕朝廷念其廉介賜半俸養老陸通志

按明史金濂傳濂數為御史所劾紳與同時所劾蓋濂也七卿表無所謂尚書金連者應是傳寫之誤而山西通志載此事亦誤作連

薛理永樂二十二年進士授行在戶科給事中宣德初中官驕橫理論劾剴切尋授衡州府知府有惠政嘗捐俸資給士之貧乏者在郡數年以疾乞歸同上

劉純山東歷城縣人正統十年任嵐縣令剛直不阿人

皆稱頌山西通志

尹宏字克寬世為歷城人温州府志云宣德二年任温州府同知先是軍衛縱橫民罹其虐宏一以禮法制之期月帖然亢旱竭誠致禱隨應歲轉大熟以艱去閩書云宏正統中以貢生任泉州知府歷官廉公愛民留心教養在泉撫字益勤早禱輒雨歲因不荒卒於官泉人號慕如失慈母肖像祠之仍葬其衣冠郡城東立碑頌德歲時致祭塚下據劉健恭簡尹公神道碑及温州府志閩書按舊志尹宏無傳但載其為永樂甲午舉人泉州

府知府而閩書謂由貢生蓋明初太學最重宏以舉人肄業國子監故不稱舉人而稱貢生非誤也其温州同知不知即初任否洛陽劉健作其子旻神道碑有云公之先考贈太保公同知余郡是宏又嘗為河南府同知亦不知其於温州孰為先後也

旻字同仁宏子也少穎異力學舉正統十二年鄉試第一明年成進士改庶吉士景帝立授刑科給事中時國家多故旻建白多正議景泰四年刑部尚書俞士悅以勅建隆福寺啟普度齋請收所梟賊首及枷號罪人以

為宜溥天恩於存亡旻言人臣宅心以正進言以正宅心以邪進言以邪進以正則君益聖而治道隆進以邪則君日驕而治道替人主不可不辨之於早以審其蔽惑士悅心術回邪踪跡詭秘逢迎阿諛以為容悅如欲收所梟賊首自宜體皇上好生惡殺之心援古昔孟春掩骼埋胔之說何得妄言建寺設齋執左道以亂政如欲收枷示罪人自宜舉皇上恤刑之典援古昔仲春省囹圄去桎梏之說何得謬言適當普度挾異端以要君其不能引君當道輔君以德如此若不早察則其姦邪日甚諛佞由此成風異端由此橫流正道由此晦蝕邇

者徐州諸處災異迭見言者皆以小人在位正此之類誠宜置士悅於法使邪人不容於清朝而將來者有警其侍郎周瑄劉清阿順苟從罪亦惟均詔曰士悅等職典刑獄心存矜恤所言乃其當然旻何得坐以阿諛其置不問天順初遷左給事中奏事殿內帝偉其貌欲大用之擢通政叅議陝西用兵命往督餉六年春上言大寇已遁而我師八萬餘人日供芻粟悉取之民間且軍民轉輸動數百里牛斃車摧道塗嗟怨今東作方興豈可捨耒耜供輸輓近聞平涼民漸逃竄倘軍興不息必轉為盜邊患未除隱憂方大帝以為然詔邊臣亟畫戰

守旻復條上安邊十策母喪起後擢吏部右侍郎成化五年轉左姚夔卒旻代為尚書欲收物情兼採南北人銓拔無滯賢愚皆悅兩京災異偕文武大臣陳時幣十八事帝多採納汪直開西廠旻潛附之項忠將劾直具奏令郎中姚璧請旻署旻曰疏出兵部即當為首璧曰公九卿長也旻怫然曰今日亦知為九卿長耶強署之而使人報直直遂逐忠與旻交益固帝惑近倖異端曲藝咸中旨授官旻等頻詣左順門候中官宣旨翼日仍依故事覆奏中官亦厭其煩屬母覆且令得官者勿廷謝遂廢舊制十四年加太子少保尋以直言加太子太

保久之又以中旨加太子太傅初旻與劉珣王越深相結又善以智數籠絡人故典銓久謗議不及惟大學士萬安學士彭華深疾旻越珣相繼去旻勢漸孤而方士李孜省貴幸數千旻不能應安與孜省比而傾旻會鄉人兵部郎中鄒襄謫官指揮張旺等奏留之下部議旻請可其奏安孜省遂諧旻落太子太傅仍為太子少保而侍郎耿裕黎淳郎中鄭宏等皆得罪已復訶旻子侍講龍諸陰事下龍詔獄執訊午門多所株連削旻太子少保以尚書致仕旻有才智而急功名素附麗中人至是為安等所逐宏治十八年年八十二卒贈太子太保

諡恭簡子龍字舜臣成化五年進士改翰林院庶吉士授編修未幾轉侍講安啖言官劾其招權納賄逮下詔獄命三法司錦衣衛廷鞫之遂黜為民先旻卒

據實錄及明史

葉

按尹旻明史無傳傳維鱗明書載入姦回傳詆之甚力蓋據尹直瑣綴錄而為之殊非公論惟孝宗實錄稱其在吏部先後二十餘年甄別人物隨才授任各得其職畧無貶語明史彙列傳亦最平允灼艾別集云旻掌銓衡十八九年選法公平士有定守萬安深嫉之然旻在吏部久公論已定又劉

環在內閣能持正論及珣以讒罷安引尹直入閣託所私道士李孜省譖旻下其子侍講龍於獄令旻致仕連及旻鄉故舊皆降謫外補才望如鍾侶張海輩亦貶謫吾學編云公選法通敏賢愚皆悅當時謠曰公道不如王恕選法不如尹旻蓋旻物望之重如此以直瑣綴錄行於世世或有不辨二尹邪正者王貽止引月山叢談辨之詳矣龍官侍講舊志作侍講學士誤

李森字時茂歷城人天順元年進士授戶科給事中負氣敢言憲宗時請禁朝覲官科斂征求為民害者頃之

言爵位天下之公器國家之大柄近有無功而晉侯伯
都督者有涼德薄才位九列者有以畫弈彈琴醫卜技
能得官職者名爵日輕官方日雜是玩公器棄大柄也
自今宜擇人授毋令匪才夤緣競進已又請嚴軍官黜
陟覈逃伍虛糧多報可四年四月言在京文官三品以
上例令子孫一人入監讀書臣以為各官子孫生於貴
族鮮克由禮惟知驕傲是尚計以歲月得官若槩將此
等入監不無廢學怠志宜停此例帝謂持論刻薄不體
朝廷忠厚之意而命自今三品以上官非歷任年久政
績顯著者不許濫叙其子七月御史謝文祥以劾姚夔

下獄森偕同官言文祥因劾奏大臣下獄臣於此竊見
陛下有欲杜絕言路之意夫言路者朝廷之命脉有益
於世也大矣古之帝王求諫如不及納諫如轉丸猶慮
善言不至忠言不聞又設敢諫之鼓立誹謗之木無非
開納諫之門以廣求賢之路也我朝列聖相承咸用此
道近明詔之頒亦拳拳以求言納諫為言今文祥歷任
未久恣其愚戇論列過情固宜加罪但原其初意不過
欲稱厥職而已陛下若因此重譴之則違前日下詔求
諫之意且恐大臣之中貪暴姦邪阿諛苟容者自慶得
志大肆姦惡誰敢為陛下言哉疏入不報十月遷本科

右給事中明年夏因災異上言伏見今年六月朔日有食之又聞廣東瓊山縣閏二月中颶風橫發雨雹如斗此皆陽微陰盛之徵上天垂戒之意惟修德圖治克勤天戒則雖有其變而無其應矣臣謹摭一得之愚條陳十事其一曰正心二曰謹學三曰親賢四曰無逸五曰納諫為修德之要六曰重民七曰卹軍八曰用賢九曰選將十曰抑奢為行政之目疏入上嘉納之八月以貴倖侵奪民產率諸給事言昔奉英宗睿皇帝勅諭皇親多有令家人強占軍民田地者事發重罪不宥投獻者悉發邊衛永遠充軍當時貴戚罔敢犯法軍民不至流

者本科給事中邱宏建請不許權貴奏求田地荷聖諭今後奏求田地者一切不允中外臣民莫不忻忻鼓舞奈何權豪親倖猶復恃恩恣橫不已如錦衣衛帶俸指揮同知周彧翊聖夫人劉氏屢蒙聖恩給賜田地其數不貲今彧又求武強武邑二縣地共六百餘頃劉氏又求通州武清縣地三百餘頃俱蒙俞允蓋陛下念及親親保祐之功不忍拒之曲從所請殊不知其豁壑之欲無厭畿內田地有限而小民賦稅衣食皆出於此一旦奪之何以為生且入皇朝以來百年於茲民生日衆安得尚有不耕不稼之閒田名曰求討實則強占

也伏望陛下法祖為治出令必行毋以私恩廢公義特
 勅有司仍將給賜二家之地與民為業今後敢有投獻
 者悉發戍邊奏求者許科道官劾奏治以重罪則豪強
 畏法小民被惠宗社之幸也帝善其言而已賜者仍不
 問山西災山東及杭紹嘉湖大水森等請蠲賑帝並從
 之萬貴妃專寵後宮莫得進致帝未有儲嗣言者每勸
 上普恩澤然未敢顯言妃妬也惟森抗章為言帝心愠
 欲假事斥之時森已再遷左給事中會戶科都給事中
 缺吏部列森名上詔予外任部擬興化知府猶不允乃
 出為懷慶通判未幾投劾歸不復出

據憲宗實錄及明史

按題名碑錄森天順元年進士明史藁誤以為六
 年其奏疏四通從實錄增入而陸通志載其每奏
 先昇棺於外又言因劾萬貴妃家人謫定州同知
 未任而卒明史藁云出為懷慶通判投劾歸未知
 孰是

林瑛歷城人天順間以監生任漳浦知縣當兵燹之後
 民不聊生頑梗自恣瑛問疾苦休息之犯輒不貸澹薄

簡重僚屬清肅

閩書

盧獻字世賢其先棗強人自四世祖遷於縣祖盡潔嘗
 為鄉飲賓獻補諸生從歷城教諭周顥受春秋景泰四

年舉鄉試肄業國子監成化二年授蔚州知州蔚州衛軍士暴劫鄉民獻力禁治民有冤獄累年弗白者獻為直之十年軍民皆化焉丁大父憂服除補宿州六年巡撫張鵬巡按馬進薦其治狀賜羊酒綵幣獎褒忽疽發於背卒年四十九蔚州民有為制服者據邊寧盧公墓表趙璿字文璣世為縣人璿由貢生試政都察院有能聲授山西遼州知州以平易治民諸廢具舉九年報最擢河東都轉鹽運使司同知入羨出均課無所訕致仕歸成化十六年年七十卒曾孫繼本據姚林趙公墓碑繼本字承德號蒙泉嘉靖十四年進士改翰林院

士授廣東道監察御史巡按南畿勦賊有功劾論焦維章高僊貪穢不檢時上欲南狩抗疏止之下獄三日督學北畿選集制藝及唐宋古文類成數帙題曰舉業式程刊布八郡多士翕然嚮風年如千卒官孫天開天啟三年舉人有著述據世宗實錄及舊志畿輔通志

按繼本諫南狩下獄事見於舊志不識其在何年恐世宗時無此事俟考

鄒襲字繼芳濟南衛人成化二年進士仕南京兵部武選司郎中居官清苦及歸杜門不出三十餘年以詩文自娛士大夫往謁者未嘗干以私鄉人推重之舊志

劉瓛字廷珍濟南衛人成化四年舉鄉試第一明年成進士舊志稱其歷官刑部郎中才識明決折獄稱平而廣東通志云瓛由進士歷大理寺丞成化二十三年貶知連州時長吏多務姑息民輕犯法瓛懲其弊政教嚴明遠近相戒無敢犯明年遷蘇州府同知其歷仕不可盡知今見於孝宗實錄者宏治十年六月瓛以都御史巡撫大同請給守墩官軍之在大邊者月行糧一石二邊者五斗腹裏者三斗從之七月瓛上邊備事宜一集十兵大同城兵止二千而各路屯兵數少不足調用乞令府州縣按籍選銳者發附近衛所帶管給與甲仗令

自備鞍馬隨軍操練有功一體陞賞止終本身仍量本戶稅糧多少優免人丁一足兵馬大同西路威遠衛皆極邊原撥官軍五千操守比來物故數多僅存千六百餘人雖調山西民壯千三百人戍守緣秋來春去更代不常又多老弱不得實用乞以新募土兵量撥千五百名編入本衛操守月支米一石其民壯盡數放免每名歲納銀二兩於官類解山西行都司收貯以備買馬之用一申舊例往年有召商納馬之令每納馬四匹或銀四十兩者給之冠帶以格例太重應令者少乞減損其數馬止三匹銀三十兩為便一足戰馬大同各城官軍

騎操馬匹比來死損四千有餘而負商人馬價又亡慮五千餘兩請太僕寺收貯馬價銀買補兵部覆奏謂土兵可招集然不必按籍拘選甲仗及馬皆官給之威遠衛止就召募舍餘數內有願充當一軍者陸續編入足一千五百名而止山西民壯令所司仍選年力精壯者應役馬價令太僕給銀二萬止以買馬不可移以償商人舊負之數其所擬減損納馬納銀格例良是從之時邊商賈私買鐵器璫不為防禁十二年虜陷馬營璫聞警不即調兵遣給事中吳世忠等往按之別用璫大理寺左少卿世忠奏臣前按劉璫罪得旨以璫廢弛邊備

隱匿邊情貽患地方取回別用臣愚以為陛下既知其罪必加顯罰而今乃止調大理寺少卿夫去邊方而用之在京是遷也非降也且邊方將士所以身冒白刃甘心死國者亦由賞罰嚴明有以奔走之耳今璫敗事如此而又遷之則誰肯奉公守法捨生奮勇為陛下捍患者哉臣請以軍法議處其罪上曰璫事既有前旨其置之璫數為給事中所劾訖不得其究竟舊志但云自為墓誌著生平勤苦之節而已

據舊志廣東通志及實錄

按劉璫濟南衛籍憲宗實錄成化二年閏三月庚子命都指揮劉政子璫襲父原職乃別是一人璫

父名文華以璫貴初封刑部廣東司主事再封刑部福建司郎中又贈都察院左僉都御史亦可知璫所歷官也

張鵬字用和其先定州人元末有名敬中者籍於縣敬中生璫永樂間舉人官南京後府經歷鵬祖也父諒府正術鵬登成化十一年進士授襄陵知縣入為御史憲宗末年數笞言官鵬力諫又常劾妖僧繼曉方士鄧常恩等帝心惡之出按江西盜賊多強宗佃僕鵬與巡撫閔珪交奏其事尹直等構之乃貶珪而坐鵬尹旻黨謫郴州判官宏治初擢河南僉事進叅議以協治黃陵岡

遷副使十五年進按察使鵬官河南久屢遭河患督治有方民為立祠是年秋擢右僉都御史巡撫遼東時軍政久弛又許餘丁納貲助驛遞給冠帶復其身邊人競援例避役鵬言不可因條上定馬制核屯糧清隱占稽客戶減軍伴數事悉允行尋劾分守中官劉恭貪虐罪築邊墻自山海關迄開原靉陽堡凡千餘里遼撫自徐貫後歷張岫張玉陳瑤韓重四人多得罪去至鵬稱能武宗立移撫宣府正德改元召還尋進右副都御史署院事有知縣犯贓當褫職卒殺人當抵死劉瑾納重賄欲寬之鵬執不可出為南京右都御史焦芳子黃中欲

強市其居畀通政魏納鴈不從芳父子亦怨之會瑾遣給事中王珣等覈遼東軍餉還奏芻粟多浥爛遂以為守臣罪逮鴈及繼任巡撫馬中錫鄧章前叅政冒政叅議方炬郎中王蓋劉繹下詔獄令其家人輸米遼東鴈坐輸二千石以力不辦繫遼東久之總兵官毛倫等具奏諸人苦狀請得所折價瑾勉從之閱三年事始竟皆斥為民瑾誅復官鴈前卒世宗初予卹子齊

據明史及李攀龍涇

汪左長史張公墓誌銘

按山西通志張鴈成化十二年任襄陵縣知縣持躬廉謹牧民有方未浹期刑清訟簡吏民畏服襄

陵俗於父母喪多偷葬鴈力革之令從厚尤加意學校士類咸荷甄陶擢監察御史祀名宦為明史所不載而其軼事尤多見於孝宗實錄畧錄數條於後宏治十三年三月安平鎮決河既塞之後侯家潭口復有衝決河南按察副使張鴈議塞之十六年三月癸酉巡撫遼東都御史張鴈奏遼東山海關至開原靈陽堡該築邊牆一千百有餘里工程浩大所費不貲乞不為常例令巡按監察御史及遼海東寧道分巡官將見提并未叅官負除正犯死罪失機敗倫傷化例該降級者其餘雜犯以

下俱准米收贖每米一石令築塙五尺不願者出銀八錢催役兵部覆奏從之是月丙申兵部覆奏巡撫遼東都御史張鶴所言定馬制者謂遼東舊止用軍馬今鶴欲倣京營馬步兼用未知邊鎮與京營事勢同否請仍行鎮巡官議處以聞其曰清隱占曰定軍伴者請通行各邊著為例曰查流寓曰限生儒者宜悉如所請從之戶部覆奏巡撫遼東都御史張鶴所言清屯糧事謂屯田子粒未可暫免請下鶴督所屬查理撥田如邊屯俱被侵掠不可耕宜設法耕種其曰停冠帶曰嚴引限者皆

可行命如議六月辛亥分守遼陽副總兵都指揮使孫文毅坐守備不設當死巡撫都御史張鶴奏文毅雄健驍勇武藝精絕實為一時將才初亦亟思報効不意誤中賊計思得掩襲然比之擁兵自衛見賊先逃者不同輒致棄市情實可矜臣聞漢韓信坐法當斬滕公壯其貌釋之宋岳飛犯法將刑宗澤竒之使立功贖罪今遼陽事急殺此壯士誠為可惜且使功不如使過文毅繫於囹圄已三年若獲再用必有後效乞不為常例釋送總兵處聽調領軍如遇敵能斬獲首級五顆者宥其死或

立竒功則仍復其原襲祖職下兵部議謂文毅已得旨宥死發充山西平虜衛軍今鴈復薦其可用請暫免發遣仍以平虜衛軍存留本處聽調後有功如例陞賞從之八月乙卯巡撫遼東都御史張鴈以會奏廣寧都指揮張天祥等捷報失於詳審上章自劾請罷所任待罪上慰留之用心治事十七年十月甲戌初巡按山東監察御史余濂奏巡撫遼東都御史張鴈偏聽致讒縱子為惡又如撫順一所實邊關重地自成化間奏調招集軍餘千三百人補其缺伍迄今二十七年矣頃因招首屈

勤七妄奏鴈不究其實遂欲盡散諸軍臣固執不可乃止調勤七所領百人於汎河操守又以興作勞擾官軍乞徵還京師更擇堪任者代之於是鴈上疏言兵部昔嘗移文謂屈勤七等自陳初以捐資募兵授冠帶總旗統其所募之卒隸於都司別為操練以備征調其後乃補撫順所軍伍之缺以他官領之宜改正仍舊前撫都御史韓重審究得實仍令統攝諸軍操調如故屬者汎河有警臣遂調勤七等剿之蓋以撫順邊情視汎河為緩而余濂乃批行都司云勤七等官軍恐難輕率動調其

糧賞當於本所類造支給都司其即呈巡撫總理糧儲衙門不許恣意擅變成法臣竊惟御史之於都御史名器不無上下之別今余濂批語皆以上臨下之詞且臣若果恣意變法濂自當指實劾奏豈可不顧名分有失大體將臣放歸田里仍命大臣及科道官辨別是非復斟酌巡撫巡按公會禮儀文移體式通行遵守上下其章於刑部仍命禮兵二部議濂亦上疏自辯以為臣所謂不許擅變成法者乃為都司衛所而言為因臣劾奏仍捃摭他詞欲致誣害且巡撫巡按事有關涉行令所司

轉達亦事體因襲之舊於是禮兵刑三部議今後巡撫巡按公會文移宜各遵禮制都御史正坐御史旁行都御史劄付御史御史則具呈都御史或有各屬相關事情應轉行者則抄按轉行其有事於軍馬糧餉彼此相關仍行知會余濂奏張鵬偏聽致讒縱子為惡未見指實張鵬所奏亦未免出於有意皆當有罪濂今以他事下鎮撫司獄宜候事完之日逮問張鵬候邊情寧日取回問罪或量加罰治上從之命特宥鵬罪十二月壬申巡撫遼東都察院右僉都御史張鵬乞致仕不允

齊字宗魯年十六從鴈之郴州歸補諸生舉宏治八年鄉試入太學正德元年鴈為瑾所構又從之獄橐餽愈益謹八年授金華府同知俗故健訟齊先繩其枉者片言伏之餘逮立遣有李江者殺父妾而無毒迹齊廉得其實置於理眾稱神明再攝衢州皆有能聲嘉靖元年滿九載且行過潛見築甬道長竟縣者為白臺省罷其役無何遷涇府左長史時始封尉卒無常食齊請給廩者三年人甚德之四年年若干卒子汝椿歷泰安寧海二王教授

二王教授

據李攀龍撰墓誌銘

趙璧字潤文成化十四年進士授刑科給事中時萬妃

家人驕橫璧奏劾謫榮經主簿天水六番高陽二招討讐殺不止璧奉命往諭至則帖服酬以金帛不顧宏治改元調無為州判官尋遷知州又遷陝西僉事行部至永昌金川堡遇敵千餘騎璧挺身與鬪斬首數十級奪馬數十匹尋卒於官朝廷嘉其功遣官以羊酒祀其家

據舊志及陝西通志

按成化十四年為戊戌舊志訛戊辰今正之

邊節字時中其先淮陰人元至正間節高祖朝用徙歷城冒王姓三世至節父寧始復邊氏寧仕至應天府治中節脫乳即善記誦有至性寧為舉人時居京師逆旅

八九日不知人語傳至家節祖母萬母王皆泣曰無壯
 子誰可往視者節時年十二應聲曰兒可往萬王嘉
 其意陽許之明日雞鳴起請治行萬王曰孺子足未造
 里門豈可上京師節伏地泣曰至親莫如父子大人客
 千里未知死生兒不行是弗子也且甘羅生十二為秦
 上卿使燕趙兒何獨不能往耶不得已使里人張某相
 之行至則寧已愈人以此奇之成化二十三年舉鄉試
 卒業太學正德元年授代州知州地多豪家強橫不服
 役節召父老與言君子野人之分使布告諸豪咸帖帖
 率教獄多繫囚皆頑慢不時入賦者節釋之與定限使
 入賦賦不及限而至巡按御史某故劉瑾私人行部屏
 人與節語降色求賄節不與坐劾免官歸惟日飲酒不
 問家事郡大夫欲舉節鄉飲大賓或以其劾免難之大
 夫曰乃邊公所以為賢也卒舉之節修美佻爽善口辯
 自號介菴嘗曰吾慕蘇子卿之為人幸他日第進士必
 以漢卿易吾字竟不果正德六年年六十二卒子貢見
 文苑傳 據邊貢先代
州府君行狀
 張良弼字夢徵號懲軒其先信都人元至正末有占籍
 縣北會清鄉者良弼高祖也祖禮敦儒行為鄉飲賓父
 進灤州判官良弼五歲能作字年十三聞御史梁澤較

科舉士良弼自懷卷給閣者入梁視其文甚異之竟許入鄉試而家人未之知也及父官灤州良弼遊京師學於邑人王勅禔褐麤糲歲一至灤省覲成化二十二年舉於鄉宏治六年成進士觀政吏部一日尚書耿裕問諫於諸進士良弼立對數百言大約謂君子諫有三重而顯身不與焉世為上民次之君又次之體恒事經世之維也情安業輯民之庇也合德溢美君之懷也徇民而妨世諫之陋也逢君而厲民諫之蠹也表已而章君諫之賊也裕喜以為名言言於帝擢戶科給事中封駁咸關大體未幾勅視光祿寺及請內藏無所私為中官所憚連丁父母憂十六年服除補原官十七年命勅延綏邊儲延綏本荒服前膺命者率取成牒而返良弼歷山砦搜散逸會計稱當中貴按土著例饋百金峻拒之十八年八月遷兵科右給事中十月遷禮科左給事中時武宗即位劉瑾竊柄良弼抗疏數其罪上心動責瑾瑾力構之良弼且病強命勘宣府倉而日使衛卒至卧内假視病伺之及赴宣府復誣以姦黨榜姓名於朝與大學士劉健等五十七人皆落職正德二年三月十五日也五年瑾伏誅諸得罪者皆錄用良弼獨不與朝貴通書問十二年吏部尚書陸完疏薦起湖廣叅議提督

太和太嶽諸宮觀至襄陽下令數十條以厚風俗莫流
亡為務太嶽故設內侍司香儀久且預宮觀事良弼曰
安能與若輩一朝居耶以病求去抵家卒年五十八子

延壽德府典簿

據劉天民張公行狀及
邊貢張夫子墓誌銘

周秀字公全其先長洲人祖鏐舉進士歷官都督府都
事為讐所誣罷以薦起為山東運司經歷而沒葬歷城
子孫遂占籍鏐生溥見文苑傳學者所稱書樵先生也
溥三子伯程仲導季即秀少好學尹旻重之曰周元氏
不亡矣宏治五年與程同舉於鄉計偕京師名藉甚士
子從之游者多成名蔡天祐黃臣其尤著者選蒙城知

縣甫三月謫清豐丞時巡游多事捧檄奔走致疾嘉靖
初吏部尚書喬宇薦知上元處繁劇裕如未幾復薦為
懷慶同知與守不和鬱鬱卒年六十三當正德初劉瑾
竊政羅織士大夫中以慘禍海內側足而立聞秀名招
致之或勸勿往秀笑曰是非爾所知也竟往見瑾問象
緯曰左傳云天道遠人道邇問兵謀曰虞書云舜干羽
於兩階七旬有苗格問術數曰有漢睦宏夏賀良儒生
之覆轍也遂大忤其意留旬日遣歸及瑾敗或問見瑾
何也秀曰吾不往見則禍及吾伯仲矣時程知寶抵縣
導為嘉興知府也及秀知蒙城宦豎邱德守鳳陽大肆

誅求秀毅然弗從以狀聞上官德乃誣搆之被逮下錦
衣獄拷訊幾死已而謫清豐即墨藍田志其墓謂秀始
見瑾跡類陳太邱云程字公度導字公慶宏治十二年
進士據張蕙書樵先生墓表及藍田懷慶同知周君墓誌銘
李澤歷城人正德間以舉人任保德州知州澤先官沔
縣晉忻州知州及蒞保德興除利病不遺餘力民皆愛
戴武宗幸山西糧餉不給澤奉部院檄召買唐家會未
旬日得米三百石草十萬束公用充足中外賴之後以
疾求去送者載道祀名宦山西通志
按李澤成化二十二年舉人舊志無傳僅載其知

忻州

劉緒字繼志父璟鞏縣丞以廉著緒少有志操宏治五
年舉於鄉肄業國子監久之選高邑知縣俗狡詐好訟
獄多積牘緒立判曲直良民便之巨盜掠鄉聚緒率眾
捕其渠脅從者皆屏息時招諸生講授為文之法甚有
政聲知府楊某索金不得嗾之又以言忤巡按羅某會
豪民曹惠者匿罪人緒捕之急惠乃誣他事控於羅羅
窮治無左驗謀於楊楊曰是何須興大獄即考以殿無
弗黜矣竟奪其官正德五年也歸里以教授自給卒年
五十六子天民見文苑傳曾孫亮采據劉天民先考行狀

亮采字公嚴為人警敏和易萬歷十九年舉人明年成
 進士授鹿邑知縣縣軍民混雜稅糧隱詭吏莫能究亮
 采各正其籍又善決疑獄頌聲大作父憂服除補蘭陽
 蘭陽舊苦河患嘗漂沒民居亮采策其便鳩工築要害
 凡十八日而竣又革儀馬及做夫之役一時裨政悉捐
 以上考召為戶部主事病歸築室靈巖寺葛巾道服以
 終老亮采嘗作歷城縣志未就工詩及書畫時稱三絕
 通音律以舌抵齶作韻可與絲竹合奏夢神人授以詩
 覺而繹之知將終乃旋里卒年六十五

據墓表及舊志

按河南通志亮采知蘭陽教士恤民鋤強矜弱築

隄修城去之日士民攀留百里不絕祀名宦靈巖
 志載其退居林下於靈巖寺構面壁齋詩酒自放
 士大夫聞風而造廬與遊者接踵焉

徐暹字進甫父貴以庖蹕功授東華門江西鉛山所大
 使有善行暹幼嗜學貴恐致疾每讀書至夜分趨牕下
 止之暹匿燈俟父寢仍默誦不倦宏治五年舉於鄉三
 上春官不第恐親不逮養焚香籲天願以壽易祿十五
 年登第試政都察院而父卒朝夕哭謁墓側終喪如一
 日授南京工科給事中時劉瑾方竊柄暹抗疏論之械
 繫錦衣獄笞八十黜為民凡七年足不入城市瑾敗用

御文周期雍薦起山西按察司僉事晉府官以事餽金
遲叱之出卒論如法正德八年巨寇混天王擾三晉遲
與副使張璉設方畧殲其魁民為之謠曰不發一矢賊
乃盡死不荷厥戈賊死實多以功僉副使憂勤罹疾卒
於官年四十九遲慷慨仗節聲動朝野然性恬退被黜
耕薄田以自給無纖毫缺望意有功輒以讓人不自伐
人尤難之據明一統志及薛樟徐公墓表

按山西通志載遲為南京工科給事中奏留劉健
謝遷繫詔獄廷杖除名與此小異要之為忤劉瑾
耳

祝壽歷城人進士正德中由兩淮運同擢守黎平剛正
沉毅禁令整齊編置里甲民皆稱便賢聲上聞遷雲南

叅政范承勳貴州通志

按祝壽字靜菴正德三年進士舊志無傳但云雲
南布政而此云遷雲南叅政河南通志又載其曾
為右布政使其歷官之詳不可考矣

李珙字敬之濟南舉人正德中知南皮時畿內流寇勢
張城多陷惟南皮禦甚備賊所至皆有內應珙燭其
姦預拘無籍假他事收禁之城以克全畿輔通志

按李珙不見於舊志不知是縣人否再考

董昌字文隆祖正武安縣丞父瑩瑩嗜佛經而昌好詩書學於伯父平山知縣璽因為瑩所惡夜讀以棉衾塞牖晝則裹糧赴學宮重違父意也宏治十一年舉鄉試第六入太學久之選新河知縣值流賊至城久圯無備驅市民拒守賊大入厲聲索董知縣而昌溷民兵中身被數十創頸筋斷者三與積尸相枕三日賊退取葫蘆瓢包領下得不死以城陷降許州判官踰年遷定遠知縣尋丁父憂服闋補太湖縣多逋賦以信誠開誘之民竟樂輸時討寧王宸濠兵道出太湖供億餽餉倉卒能辦而民不知厲以勞賜銀牌彩幣擢揚州通判以童奴

受金罷嘉靖十四年年七十卒 據劉天民東溪董先生墓誌銘

江濬字子泉其先棗強人有名湖者遷於城西門外方水而居人謂之江家池湖子秀徙城東四十里杏園五傳至濬舉正德十四年鄉試嘉靖十四年授正定知縣縣有點少年衷石橐中而假宿館人旦發其裝佯驚謂或寢其金易以石獄且成濬至鞫其金所從來曰舉諸子錢家備引子錢家無應者少年遂伏罪居四年以薦入為四川道監察御史從幸承天除道濬沱河檄有司造舟為梁覆土其上列檻屬之車駕稱便十八年巡按隆慶劾大同總兵下吏及再有寇遂以捷聞賜金幣加

俸一級十九年巡按應天奏罷府尹洪某及奏池州知府柯某與撫臣異狀奪俸三月以南臺御史奏解遷大同知府核晉宗人祿簿懲干謁之弊有為子甲聘女而甲沒欲以妻其子乙者女既改適訟於濬濬命以後壻之聘三十金償前壻家人服其平允後按察使奪女以與乙女遂縊死久之遷陝西按察司副使整飭洮岷邊備道一年歸又十五年為嘉靖四十三年年七十八卒

子如錦縣諸生

據李攀龍江公墓誌銘

周尚忠字本誠始祖政良元至正初以淘金官來居大清河北遂為縣人尚忠年十二補諸生為學使畢所器異夜母不飲酒食肉者五年宏治五年歲饑鄉人貸其財不能償者尚忠勸其祖為焚券後羣盜過其廬相戒曰勿驚周先生一日遇盜於塗值雨泥淖盜扶尚忠送之行尚忠通毛詩從學者前後五六百人歷試於鄉不得舉嘉靖五年歲貢授葉縣訓導立教以持敬為主又日為士講經義越三載投牒歸十五年年七十四卒子三居郊諸生居岐字伯康嘉靖四年舉人官葉縣知縣著有文則詩則二書自序甚有理致居魯由歲貢舉嘉靖十三年順天鄉試孫六學六學子繼繼見方伎傳

據王

廷相周公墓碑

陳朝字子虛歷城人嘉靖五年進士任建昌推官臨事無大小立見隱微嘗督造圖冊工省弊清前後有司無能及者兩署縣篆俱著能聲

建昌府志

按舊志云朝號近山為諸生時遇呂仙後權稅維揚復遇比守臨洮有殲虎除妖之政及解組布衣角巾徒步懷刺大有古人風有遇仙傳殲虎賦其語不似傳體故易以建昌府志一則又按陳朝嘉靖丙戌進士舊志訛作正德壬戌歷仕保德府臨洮府知府

范瑟字孔和其先東平人元末有名思溫者避亂於縣

之天馬山因家焉五傳至瑟瑟十餘歲讀書山中二龍窺其牖諸生成辟易走瑟不動又嘗聞天樂作雲中諸生不聞也嘉靖十一年第進士改庶吉士父憂服除授翰林院國史編修進經筵講官十七年分校會試明年謫開州判官身勦巨寇遷大名口口尋擢南京戶部主事歷負外郎郎中二十四年入賀遷四川叅議上川南道駐雅州及嘉定先是都蠻之叛守臣檄兵討之輒為所抗瑟乃身往諭以朝廷威信都蠻稽首謝請內屬如故二十九年再入賀拜陝西副使分巡西寧道明年征羌道遇暴風起東轉西瑟曰羌豈舍掌吉而就紅屋乎

乃趨紅崖羌果至迎擊大敗之復戰斬其酋長九人此
 二月事也八月又戮其酋長寫爾定等羌遂平屬北虜
 傍塞遣百戶李堂齎牛酒詣其王俺答不亥曉以利害
 明日獻馬十匹謝三十一年虜更寇三川瑟將兵三千
 禦之復破其衆於紅崖斬首數十級并殲肯騰狼台吉
 事聞尚書上其功未報明年以他奏報免其官四十一
 年年若干卒於家

據李攀龍范君墓誌銘

按陝西通志范瑟字栢峯為副使文武通材性剛
 直愛禮人士蒞任時屬蕃驕橫攻打堡塞烽烟四
 起諸將不能禦瑟至練兵馬運糧於西川各總堡

分伏官兵為持久之計已而乘虛自領奇兵潛擣
 碾伯水溝大捷又下捕賊之令有能三人共捕斬
 一名者賞銀十兩本賊馬匹器械即給之於是無
 一生蕃敢至界者

吳聞詩號養齋嘉靖十一年進士性磊落不羈知天長
 縣飲酒賦詩不廢吏事祀於鄉

舊志

金城字邦衛嘉靖十七年進士其始授何官舊志不載
 何氏閩書載其以御史巡按福建值佛郎機夷人入漳
 州檄道海副使柯喬禦之勅浯嶼把總丁桐及去任副
 使姚翔鳳受夷人金縱之入境乞正其罪同安覆鼎山

賊猖獗掠漳泉諸縣城與巡視浙福都御史朱紘督官
 俘獲因條上便宜四事其一白葉坂雲嶺地方跨龍安
 二縣百餘里山林險阻實為盜藪請即其地創建二堡
 并立官舍歲令漳泉二衛守之而白葉坂尤險遠孤危
 宜移源口渡巡簡司官兵協守其二覆鼎白葉坂賊既
 殄滅其中山田可籍入官給軍耕種其三武平永定諸
 處乃守備俞大猷汎地前為漳州所調致覆鼎賊起倉
 卒失防今宜行隣省無輕調遣俾守土官各盡其職其
 四地方遇警因損軍令嚴輒不敢動調一軍而募鄉兵
 拒敵所養非所用今宜通行領兵官凡有警俱依此

例調官軍征勦其勇往者雖殺傷仍上功幕府若引避
 觀望即全軍無失亦治罪下兵部覆議報可後遷蘇州
 知府三十一年考績北上歸有光為人作序送之有云
 郡吏治抗傲疆場靡寧詔使旁午責數年之逋負於俗
 奢民貧災殫凋瘵之餘寬則廢上供急之則傷民命金
 公鎮以寬靜處以宏簡不震不竦能使上安而下服之
 可謂難矣

據閩書及
歸震川集

薛樟字子喬事親孝嘉靖二十三年進士授山陽知縣
 擢廣東道監察御史疏劾嚴嵩遂挂冠歸嵩敗臺省屢
 徵不起所著蘭臺奏議諸書

稽志

按明史藁姦臣傳前後劾嵩世蕃者謝瑜葉經童漢臣趙錦王宗茂何維柏王昇陳塏厲汝進沈鍊徐學詩楊繼盛周鈇吳時來張翀董傳策皆被譴經鍊用也曷置之死繼盛附張經疏尾殺之他所不悅假遷除考察以斥者甚衆薛樟之名不見於史而舊志距樟時尚近不宜有誤俟考

張嵐字華巖嘉靖二十三年進士官至山西叅議事嫡母曲盡其孝居喪三年不見婦女蒞官清廉居鄉醇謹鄉評以為人物稱首孫廷彬羞出例金遂屢舉鄉賢不果子志萬歷五年進士仕至湖廣叅議

同上

洪遇歷城人進士嘉靖中知秀水先是民凱輕役多析戶寄產遇令民自疏歸併賦均而不擾歲大饑自鬻者眾不待上聞亟發廩賑之全活者無算

舊浙江通志

按舊志洪遇嘉靖二十三年進士西安府知府未載知秀水得此乃知其始官耳

殷士儋字正甫其先武定州人高祖旺德府審理正曾祖衡以永平訓導入為德莊王教授從之國濟南以勞績進審理正遂家焉既致仕王以師傅舊恩為畫像製贊使就其家存問比卒而永平諸生祀之學宮祖峻見儒林傳父汝麟見孝義傳士儋嘉靖二十六年進士選

庶吉士授檢討久之充裕王講官凡關君德治道輒危言激論王為動色遷右贊善進洗馬直講如故隆慶元年擢侍讀學士掌翰林院事進禮部右侍郎未幾改吏部明年春拜禮部尚書掌詹事府事其冬還理部事明年正月朔望日月俱食士儋疏請布德緩刑納諫節用飭內外臣工講求民瘼報聞以舊恩進太子太保時寒暑皆罷講士儋請如故事四時無輟并進講祖訓及大學衍義貞觀政要帝嘉納之始世宗定宗藩條例親王無後以兄弟及兄弟之子嗣不得以旁枝繼嘉靖末肅懷王薨無子其太母定王妃請以輔國將軍縉熿嗣禮

部議縉熿實懷王從叔不可承祧詔許以將軍攝府事及帝即位定王妃復請前尚書高儀執不可得旨如先帝令縉熿重賄中官屬宗人為奏所必得士儋持之甚力帝以肅藩越在遠塞不王無以鎮之遂許縉熿嗣士儋又疏爭且曰肅府自甘州徙蘭州實內地即云邊郡宜別選郡王賢者理府事帝意堅不可奪士儋乃請封為郡王諸宗如縉熿者率以此令從事帝終不許故事郊畢舉慶成宴自世宗倦勤典禮久廢帝即位三載猶未舉行士儋始考定舊儀行之是月遂以本官兼文淵閣大學士入閣辦事俄俺答封事成進少保改武英殿

始士儋與陳以勤高拱張居正並為裕邸講僚三人皆柄用士儋仍尚書不能無望拱素善張四維欲引共政而惡士儋不親已不為援士儋遂取中旨入閣以故怨拱及四維四維父擅鹽利為御史部永春所劾事已解他御史復及之拱四維疑出士儋指益相構御史趙應龍遂劾士儋進由太監陳洪不可以參大政士儋再辨求去不允而拱門生都給事中韓楫復揚言脅之士儋亦疑出拱指故事給事中朔望當入閣會楫士儋面詰楫曰聞君有憾於我憾自可耳毋為他人使拱曰非禮也士儋勃然起曰若抑我我不敢怨今為四維齟齬我

而欲令彼據我座若逐陳公逐趙公復逐李公今日逐我若能常有此座耶奮臂欲毆之居正從旁阻解士儋再疏請益力乃賜道里費乘傳歸有司給廩隸如故事家居十一年卒時居正垂沒四維為政怨士儋贈太保諡文通久之改諡文莊孫啟賢仕潞安府同知有

清操重於時

據明史及于慎行殷公行狀及舊志

張存智字應貞號春溪嘉靖二十八年舉人任昌黎知縣縣近塞稱嚴邑存智至勸農繕兵甃墉甃泉招集流亡給之田畜二歲始錄之籍自占者萬餘口擢戶部主事進郎中致仕歸

府志

韓應元字雲卿父剛見一行傳應元嘉靖四十四年進士授無錫知縣識孫繼臯於童子試仕至山西叅議以貢市功蒙賞祀於鄉據舊志

按山西通志應元隆慶初以進士知懷仁縣釐正祀典均平夫役至今猶遵其法陞評事不識與知無錫孰為先後

劉宗禹字一中為殷士儋高弟嘉靖間舉人授新城知縣遷沁州知州轄三縣農不諳種植之法宗禹循行阡陌親為指示至秋倍稔從子遷字出谷豪於詩而性剛直萬歷十年舉人授商水知縣歷刑部四川司主事擢

衛輝知府謁潞王王一見器重之時與尊酒論文時中

官多浸漁民利民有訟之者遷置諸理民戴之如父母

據某人採訪劉氏家傳

按劉氏先塋墓門題額後署曰知漢陽襄陽延安三府事孫男宗禹立則宗禹官不止於知州也惜其事不可考塋在城西南十里

傅延者歷城人隆慶間以貢知應州性極端方政惟節

愛辦山糧不辭利害值冠誣大有擔當祀名宦山西通志

按畿輔通志延者以貢知祁州有豪右犯法上官屬出之延者指其冠曰此冠可奪此法不可奪上

歷城縣志 卷之三十一 明 三十一
官愧謝六載卒於官此及山西通志俱云歷城人
而舊志不載

師必大字東津祖理昌黎典史父孟深澤教諭必大有
文名隨學道楊溥試六府隆慶六年以溥薦授靈壽知
縣以廉謹聞課士勸農多所振作三載告歸民為立祠
樹碑述異政

党其超
採訪

按師必大不見於舊志據其家傳如此而靈壽志
職官內亦不載

于鯨字子長始有于六者從東海徙歷城又六世而為
芳芳見一行傳鯨其仲子也少穎異九載通左氏傳十

五補諸生第一太倉王世貞在郡召至即試而三覆之
謂阿懋不及也李攀龍亦命子駒與之交許邦才欲得
快壻無當意者於路間見鯨與語曰此正吾倩矣遂以
女妻之而薦於殷士儋嘉靖四十三年舉鄉試隆慶二
年成進士即出士儋之門試政刑部未幾以母憂歸服
除授刑部湖廣司主事故主事遍閱郡國獄凡有可否
悉聽尚書裁及鯨為之尚書不能易一字能聲籍籍輦
轂間擢河南道監察御史出按正定黜貪墨撫善良吏
民帖然以安順德富人置曰姓姬前使深文論適矣鯨
覽而笑曰於禮買妾不知其姓則卜之何擬之重耶立

破械釋之自餘冤獄往往原情求活然竟以多平反失
權相心至鐫俸回京師行李蕭然都御史賢之為奏上
報可復故官久之按順天順天多戚畹輕俠相通又官
官廬兒寄請為姦利終鯨任無敢犯者嘗行縣漁陽為
將軍戚繼光所部畧鯨按覆軍政甚嚴繼光介胄伏謁
鯨視之蔑如都下一時傳語謂鯨能屈大將軍矣還朝
以資久掌河南道萬歷八年監試未幾推掌京畿道畧
無通假丰采凜然尋用學例遷太僕少卿十年護張居
正喪還荊州被議罷歸鯨有內行少時與宗人叅政達
正善達正死代為行喪立後其事發嫂一無所恠遇季

鯨友愛備至晚罹父憂晝夜號哭遂日委頓不逾年卒

年如干 據邢伺于
公墓誌銘

劉伯縉字薦卿隆慶二年進士初任蠡縣遷戶部主事
權北新關稅溢解二萬四千餘金守杭州蠲者堂舊例
入庫公用兩定軍民大變陞陝西按察司副使潞州兵
備道公嘗自銘曰居則為端人正士出則為循吏良臣
雖矯俗太激遇物寡諧然自筮仕至官歸無異布素縣
人咸仰其清標云弟伯綬 舊志
伯綬號吾山萬歷四年舉人歷知淳山順義上元三縣
所在有聲京兆謁留璫例皆長跪伯綬獨抗禮璫重其

名緝江寇理關務以廉敏聞陞雲南楚雄知府加意撫
 夷境內肅靖伯綬生平好學老而彌篤事兄尤恪謹同
 趙應奎字子徵其先棗強人明初有趙十四者徙歷城
 五傳至強為應奎父強見一行傳應奎由長史掾授壩
 上倉大使謹會計執槩不爽釜鼓自奉取給家廩俾諸
 弟轉穀歲餉之改小村鎮巡檢屬有劇賊聚松徐間上
 官檄應奎捕之乃率卒往遇賊輒格鬪俘十餘人賊益
 衆卒不及其十之三遂為所獲刃加於胸應奎不為動
 從容為陳說利害賊竟解諸上官皆壯之而應奎忽棄
 官歸年五十一卒子世卿

據李攀龍將仕郎趙公墓誌銘

世卿字象賢隆慶五年進士授南京兵部主事張居正
 當國政尚嚴世卿奏匡時五要請廣取士之額寬驛傳
 之禁省大辟緩催科而末極論言路當開言近者臺諫
 習為脂韋以希世取寵事關軍國卷舌無聲徒據不急
 之務姑塞言責延及數年居然高踞卿貳誇耀士林矣
 然此諸人豈盡隳詬無節忍負陛下哉亦有所懲而不
 敢耳如往歲傅應禎艾穆沈思孝鄒元標皆以建言遙
 竄至今與戍卒伍此中方之士所以內自顧恤寧自同
 於寒蟬也宜特發德音放還諸人使天下曉然知聖天
 子無惡直言之意則士皆慕義輸誠効忠於陛下矣居

正欲重罪之吏部尚書王國光曰罪之適成其名請為
公任怨遂出為楚府左長史明年京察復坐以不謹落
職歸居正死起戶部郎中出為陝西副使累遷戶部右
侍郎督理倉場世卿饒心計凡所條奏酌劑盈縮軍國
賴焉進戶部尚書時礦稅使四出為害江南稅監潘相
至擅捕繫宗室曩時關稅所入歲四十餘萬自為稅使
所奪商賈不行數年間減三之一四方雜課亦如之歲
入益寡國用不支邊儲告匱而內供日繁歲增金花銀
二十萬官帑日充羨世卿請復金花銀百萬故額罷續
增數不許乞發內庫銀百萬及太僕馬價五十萬以濟

邊復忤旨切責世卿又請正潘相罪且偕九卿數陳其
害皆不納世卿復言脂膏已竭問井蕭然喪亂可虞揭
竿非遠不及今罷之恐後將無及帝亦不省三十二年
蘇松稅監劉成以水災請暫停米稅帝以歲額六萬米
稅居半不當盡停令以四萬為額世卿上言鄉者既免
米稅旋復再征已失大信於天下今誠欲免稅額之半
而陛下不盡從豈惻隱一念貂璫尚存而陛下反漠然
不動心乎不報其夏雷火燬祖陵明樓妖蟲蝕樹又大
雨壞神道橋梁帝下詔咨實政世卿曰今日實政孰有
切於罷礦稅者上疏言不可不罷者六甚痛切語多不

載帝優答之而不行至三十四年三月始詔罷礦使稅亦稍減然廣東雲南四川稅使自若吏民尤苦之雲南遂變作楊榮被戕而西北水旱時見告世卿屢請減租發賑國用益不支踰月復奏請捐內帑百萬佐軍用不從世卿遂連章求去至十五上竟不許先是福王將婚進部帑二十七萬帝猶以為少數遣中使趣之中使出諄語且劾世卿抗命世卿以為辱國疏聞於朝帝置不問至三十六年七公主下嫁宣索數至數十萬世卿引故事力爭詔減三之一且言陛下大婚止七萬長公主下嫁止十二萬今即減三之一亦二十六萬有奇乞陛下再裁損一倣長公主例帝不得已從之福王新出府第設崇文稅店爭民利世卿亦諫阻世卿素勵清操當官盡職帝雅重之吏部缺尚書嘗使兼署推舉無所私惟楚宗人與王相訐世卿力言王非偽與沈一貫議合李廷機輔政世卿力推之廷臣遂疑世卿黨比於是給事中杜事全鄧雲霄何士晉胡忻御史蘇為霖馬孟禎等先後劾之世卿遂杜門乞去章復十餘上不報三十八年秋乃拜疏出城候命明年十月乘柴車徑去廷臣以聞帝亦不罪也家居七年卒贈太子少保子鉉

據明史藁

鉉字伯玉以父廕官後軍都督府都事歷太僕寺丞戶

部江西司員外郎出為河南知府調高州知府有才畧
 所至有治聲著有牧民政畧一書鉉子濬初字保一以
 祖廕仕周府左長史河南為其祖舊部政聲藉藉人口
 濬初擬作名宦錄王所為多不法濬初繩之不少假朝
 廷嘉其剛直加四品服俸擢河南知府命未下而濬初
 卒濬初子櫪桂梧櫪見隱逸傳桂梧皆諸生有文名櫪
 子恒煜喪父寢柩旁三年推產讓其兄以諸生終據趙氏家

傳

穆深號桂陽七歲能文督學周鶴臯呼為神童萬歷二
 十年登進士時神廟靜攝不親臨軒深丹墀獨對冢宰

器之擢吏部稽勲司員外郎萊州守持三千金為壽卻
 之秉公持正為權璫所忌竟削籍歸囊篋如洗亡何卒

祀鄉賢

舊志

王見賓字懋欽濟南衛人少負英姿博覽羣書萬歷三
 年登第任南陽推官疏寃摧猾多所平反守開封理煩
 治劇士民懷德治兵漁陽飭戎馬明賞罰中外倚重累
 遷延綏巡撫敵人畏之歸卒祀鄉賢同上

按陝西通志王見賓任延綏巡撫沈毅多才畧每
 籌畫邊務能集思廣益知人善使故動有成勲識
 者比之韓范云

陳九疇號東華幼讀書別館有少婦月下踰垣而至九疇辭以疾嘉靖三十四年舉鄉試第二萬歷五年進士歷官山西副使絕請託禁僕從焚通券言動不苟有古君子之風卒祀鄉賢子載春見忠烈傳同上

周璧山東歷城人萬歷間以舉人任交城縣知縣實心愛民雅甘淡薄裁冗費墾荒田開河渠繕城堡尤加意學校於貧不能自存者時時賑給之祀名宦山西通志

按周璧萬歷元年舉人舊志但云直隸玉田知縣有清操其與知交城先後不可考

張九賢字共甫原名九重舉鄉試後改焉其先棗強人

遷於縣東雁山數傳至九賢幼師劉勅力學萬歷四十年第進士授絳縣知縣有惠政調汾陽報最遷刑部主事時神宗倦勤廷臣黨勢已成九賢無所依附俄退居林下與方守地殷象賢飲酒鬪詩相羊湖山以卒朱彤

採訪

姜應科濟南人由舉人萬歷四十四年知無極縣縣有昇平橋文昌閣應科次第修舉士氣民風蒸蒸日上色其均徭役省雜支月吉布令讀法皆培植元氣之大

者鄭大進正定府志

按舊志選舉條僅載姜應科為郟陽知縣不識與

知無極孰為先後

楊承恩字君崇博學長厚萬歷間歲貢官平陽通判三
視邑篆不染纖塵致政歸家徒四壁立藜藿不充人皆
嗟嘆承恩處之晏如也知縣張鶴鳴署其第曰端僚知
府文球造廬躬請為鄉飲大賓舊志

按舊志人物傳每傳僅數語亦有歷官甚顯而無
傳者其選舉條下間綴一二語不能成傳姑錄於
後云董元學萬歷庚辰進士陝西布政為人醇謹
寡交遊亦篤行君子孟醇嘉靖辛酉舉人雲南僉
事侏儒滑稽善攝生好亭榭耿熠萬歷丙子舉人

直隸廣平同知舉鄉飲大賓陳大務萬歷壬午舉
人陝西延安同知五馬之第無一椽支風雨然諸
子孫皆以才餬口四方矣袁霑嘉靖間歲貢秦府
教授飲於鄉劉萃萬歷間歲貢壽張訓導飲於鄉
殷汝楫任河南唐縣主簿居官不阿堂官寃逮一人命
楫鞫之竟棄官走一縣稱嗟曾孫象賢萬歷二十四年
舉人直隸霍山知縣精理學善音韻積書數百卷
李寶號儒溪任河南柘城縣主簿征施五有功

按李攀龍父名寶其墓誌家傳但云以貲事德莊
王為郎不識與此為一人否俟考

殷哲字子濟通吏河南趙府審理居官清慎處眾謙和一貧如洗眾皆賢之

秦邦彥任大興縣丞精律令性剛直縣令欲殺一人彥輒出之至相毆到京兆前京兆謂令曰秦丞強項爾須讓之竟出其人後陞經歷彥以仕途難容謝政歸學律者多師之晚歲得子夢臯為諸生有文名

孫自成武功中衛經歷習律令明術數善弈棋充例貢以從征加銜都司

范名臣京衛經歷性恬雅有文人之度

以上俱舊志

按舊志於選舉之後附掾史趙應奎殷汝楫李寶

殷哲秦邦彥孫自成范名臣胡士傑八人各綴以小傳蓋明季積重之勢在科目雖掾史有政績者亦不得齒於人物而國初三途並用之意亡矣今趙應奎已前見胡士傑見忠烈傳而殷汝楫等姑以移列傳之後

歷城縣志卷第三十七終

列傳三

四

歷城縣志卷第三十八

列傳四

國朝

孫建宗字毓祺其先自棗強遷於縣父止孝見忠烈傳
建宗崇正十六年進士入

國

朝授祁縣知縣分校鄉試號得人行取戶部主事殫心
會計吏胥不能為姦順治三年充山西正考官事竣遷
郎中七年出為睢陳兵備道僉事郡縣經兵燹後一望
榛莽建宗招流亡善拊循之頓有起色撫按交章薦治
行卓異擢通政司叅議歷順天府府丞四夷館少卿太

常寺卿遷大理寺卿悉心平反轉都察院右副都御史
慨然以肅綱紀為已任上三疏皆蒙嘉納出為陝西左
布政使陝西歲輸不及三百萬而支發之額倍之建宗
裁陋規革浮費日夜焦勞形體尪羸十四年內轉太僕
寺卿卒於道年五十五祭葬如例建宗為人和易不以
已長形人短而治事必躬親無刻晷之暇遂以此致疾
子珏觀城縣教諭歷國子監學正兵部司務建宗兄子
琬字姬玉有義行惠宗嗣子惠宗事見忠烈傳琬長子
宏祖次子續祖宏祖字適來善制義康熙丙子科其文
房考薦甚力主司秘藏笥內發榜時竟忘之由歲貢選

日照訓導未任卒續祖字于萬十歲應童子試人目為
神童雍正八年進士授南樂縣知縣潔已勤撫字善防
胥役舞弊田夫野老咸登堂上壽三年以迴避離任所
攜惟書數篋耳委署正定地有名魏國公屯田如千頃
賦數倍於常續祖請於上官得減賦視他田以公事過
南樂百姓空城出迎擁輿不得行補滿城奉檄興水利
於白草溝金線河建石閘晝夜走河千工竣而以勞致
疾卒官縣人請祀名宦祠宏祖子維宸字子襄由歲貢
官蘭山訓導不索諸生一錢以老歸

孫尚
採訪

劉緯字光宿順治三年進士授崇明知縣調盱眙有能

名卒官祀鄉賢在前明與葉承宗友善嘗預修縣志其
 同訂者趙天開孫建宗蒐采者楊衍祚參閱者陳文鶴
 王鶴較正者葉承祧編次者薛霽皆縣人韓燭採訪
 葉承祧字弁紹其先麗水人成化初有金吾尉寶者從
 德莊王之國因家焉實承祧高祖也承祧少補諸生有
 志畧順治四年兄承宗知臨川縣承祧從之明年冬贛
 鎮金聲桓叛來攻承宗俾暫歸避之承祧曰弟去誰左
 右吾兄者承宗被執以死殉事見忠烈傳承祧火其尸
 而匿井中賊索之急乃夜墜城奔告征南大將軍固山
 額正譚爾泰爾泰嘉其義勇奏授興安知縣地萬山叢

患承祧仿韓愈祭鱷魚為文驅之虎皆匿跡而

寥村落少人烟承祧多方招徠給牛種減徭役

而流亡漸復會議興屯田撫按交章薦其能乃以

知任湖東三府屯務一年即有成效著屯政條議一

書貴溪南有湖亘千里盜據為藪出沒不時承祧躬往

諭以禍福雜髮投誠者三千人餘黨悉平十五年補平

陽府同知嚴保甲議鹺政能聲甚著康熙元年擢西安

府知府與屬吏約無骫法無生事凡讞牘皆手定姦胥

計無所施闢關中書院時方革制義課士用策論講求

根柢之學五年舉鄉試十六人旋舉禮部者七六年九

月卒官年五十八承祧貌豐偉習於吏事剽決酬應無
虛晷竟以勞致疾沒後部民哀之至輟春罷市云

燭採訪

張廷棟韓

柴自新字鼎臣濟南人以署守備防駐延平府時將樂

賊吳賽娘聚眾踞寨自新單騎入寨諭以禍福於小樓

上置酒結誓犒其將領於樓下至二更自新拔刀斬賽

娘首以衣裹之下樓突圍出賊黨遂遁

福建通志

孫光祀字溯玉號祚庭其先平陰人光祀通籍後始遷

於縣光祀順治十二年進士改庶吉士明年授禮科給

事中上疏陳慎銓選核鎮將覈贖錢剔衙蠹禁濫徵酌

科議六事皆中利弊部議允行歷刑兵戶吏四科都給

事中六年中疏凡二十餘上悉奉

溫旨褒

嘉典試湖廣取士百六十人而捷南宮者六十四得士

稱最盛遷太常寺少卿假歸康熙元年補四譯館少卿

修葺館署考校譯字生四十人請復舊制兼翰林職著

為令館中勒石紀德轉右通政使十二年充殿試讀卷

官晉太常寺卿會天壇有牧馬者

上遣內

侍察堂官職名或謂光祀任甫三日可勿預光祀曰居

其職敢諉其過乎遂與同官俱列名罰俸三月其年遷

通政使擢兵部右侍郎吳逆告變光祀密疏請誅其子

應熊以杜內患三藩克靖中樞有力焉十八年充殿試
讀卷官京察自陳乞休賜蟒服回籍年八十五卒子叔
諧舉人候補內閣中書叔詒字燕叔康熙二十六年舉
人選渠縣知縣渠經兵凋敝又旱不雨叔詒宿禱城隍
廟立應勤招徠廣開墾民有起色任七年行取擢兵部
車駕司額外主事以勤慎宣授刑部湖廣司主事遷山
西司員外郎署河南浙江等七司兼理秋審皆剖判如
流假歸久之再補刑部四川司員外郎充順天鄉試同
考官遷戶部陝西司郎中為侍郎遂寧張公所器異以
刑部舊事罷叔詢鴻臚寺寺丞

據王披孫公墓誌
及孫氏家傳

朱宏祚字徽蔭其先高唐州人父美先字少川明季始
遷於縣以義行重於鄉有盜劫其僕既而知為美先物
皆還之兄昌祚順治初入漢軍籍官至總督直隸河南
山東三省諡勤愍而宏祚居歷城遂為縣之巨族宏祚
年十九舉順治五年鄉試又二十二年始授盱眙知縣
革供上雜派千金俗好訟輕生為揭律通衢訟以衰止
歲旱賑饑有法鄰封就食者盈萬時蝻生遍野倏有羣
蝗過境蝻皆附翼飛去舉治行卓異

賜蟒服行取授刑部廣東司主事遷貴州司員外郎兵部督捕
郎中出為天津道按察司僉事遷直隸布政司叅議畿

輔政不設布政按察二司以守巡二道分領錢穀刑名
權埒藩臬宏祚為守道出

聖祖特簡又二年有巡撫廣東之

命以少叅躋開府前此未有也陛見奏對稱

旨賜內帑千金并鞍馬以寵其行過庾嶺除役夫之繁者廣東
自用兵來無執之征浮於正供悉罷之鹽法為藩下姦
人踞阜害竈莫敢譙訶之宏祚條八疏入告衛所屯田
畝徵米三斗三升宏祚請依民田徵八升皆允行臨高
澄邁吳川諸縣兵燹後積逋累萬皆請蠲賦流亡漸復
陽山阜商被盜擒獲黎王璣等三十餘人置大辟宏祚

訊得其情獲末減逆藩平後姦民告誥無已宏祚上疏
謂當藩焰方張聞風投冒倚其聲勢者實繁有徒迄今
平定經刑部侍郎宜昌阿來粵其應歸旗者已著籍解
京餘俱放為民十餘年來皆補行伍或歸農或死亡遷
徙無籍可稽今姦民視為竒貨蔓引株連請下部定議
不允其告告者治以妄首之罪疏上得請康熙三十一年
年遷浙閩總督時歲祲有司議使富民捐賑幾致變宏
祚嚴禁之臺灣初入版籍禁猾弁侵擾會廣東巡撫與
巡鹽御史相訐奏

命宏祚往勘又命往江南視太湖水利皆異數也三十三年大

計以疏內地瘠民佻四字不稱

旨免歸三十九年

命分修河南河工勞瘁致疾遂卒於淮南之高良閘年七十一

宏祚明敏遇事有為嘗因陛見奏曰臣荷殊恩當為人

所不肯為不敢為者人謂其無媿斯言子緇絳網纘縉

緇見文苑傳據朱氏族譜及江南通志五

絳字子垣由高唐諸生援例授刑部貴州司郎中出為

永州知州清慎自矢吏民畏而懷之內艱服除補銅仁

大計卓異擢廣東肇高廉羅道副使廣東為宏祚秉鉞

地父老猶感其德聞絳至皆迎而羅拜絳訪求利弊捕

獲數人境內肅然雍正元年遷廣東按察使 年遷

布政使以病歸又八年卒朱彤錄送

綱字子驄年十三補高唐州諸生以貨授兵部武庫司

主事外艱服闋補武選司丁母憂起補原官遷職方司

員外郎轉刑部江西司郎中有婦為強暴所殺所司累

訊不得其人綱馳至婦死所曰汝烈婦也精爽當不沒

勿使殺汝者得逸覆審遂得殺者而其衣已澣無左證

綱曰日中視之必有血痕驗之果然暴伏法而婦得旌

表監督富新倉綜覈有法總督倉場施某薦之遷天津

道副使康熙五十四年靜海諸縣蝗綱虔禱於神一夕

蝗盡去兩遇水圍蒙

賜御書克食詢問家世甚詳綱奏對稱

旨五十八年擢直 巡道

詔朱綱雖非進士出身素知其有文免繕履歷一時榮之六十年遷河南按察使多所平反雍正元年遷湖北按察使時河南旱荒綱方監賑衛輝彰德懷慶歸德四府巡撫奏留事歲而後之任及抵湖北三月即調湖南清其隱之弊又頒六條示屬吏大畧崇節儉慎用人綱往來洞庭湖目擊覆舟之慘造救生船十餘分直奉濟望甸益湖九馬嘴布袋口諸險地雍正五年晉雲南巡撫

裁用兵綱鈎稽隱漏以儲糧糗叢弊一清調福建比行奉

旨朱綱秉公正直毫不瞻顧可謂實心扶持風化之大臣綱起

身赴閩滇人當尊敬盡禮以榮其行六年六月受事福安洋盜橫虐縣獲其黨而遺其魁綱遣弁兵立擒之俄卒官年五十五詔加兵部尚書銜俾省城官吏集送所過州縣官弁親往奠醊抵里使入城治喪諡勤恪綱從

弟綵 同上

綵字萊襦康熙十二年進士授內閣中書舍人遷刑部江南司主事歷負外郎郎中三十七年擢鄖陽知府多

善政其尤著者附郭武陽堰為洪水所壞百年矣綵竭囊金督修未匝歲堰成民賴之四十八年自春徂夏靈雨六十餘日隣境閉糴百姓無所得粟綵議借存倉均貯米以活鄆民吏以未經上請白曰民命至重而拘文法可乎脫獲罪予獨當之遂出米以賑全活無算年七十三卒於官士民合詞請祀名宦

同上

鄭續善字元長其先由濟南徙京師世襲千戶終明之世不絕續善以京營官生授紫荊關都司僉書遷薊鎮松棚路遊擊順治十三年為山東撫標右營叅將慨然曰此吾先人桑梓地也因家焉歷甘肅鎮永昌叅將山

西汾州營叅將皆著勞績以病歸續善好文翰著有金川集其去永昌有為立去思碑者畧曰永昌山槎而水駛田皆磽确地當東西孔道軍民疲於奔命又青海諸部逼處藏南兢兢思逞公下車目擊凋敝狀喟然思有以振起之撫恤熒卒甘苦與共蘇息行戶值鎗隨給又折節下士勸蠲輸以活流亡浚城隍建堞櫓築垣墉夙夜殫瘁美政畢舉曩歲黃台吉別部跳梁犯塞公以恩信招徠咸惴惴聽約束相戒不敢犯金川蓋續善實能盡職故部人頌之如此

李枝華採訪

張現字槐亭縣北鄙人少好武康熙十三年由行伍授

把總十七年從將軍楊征閩藩十八年賊數十萬分屯
 灣頭等地列寨亘三百餘里進勦以現為督陣執刃大
 呼連戰皆捷以優等議叙十九年賊屯烏嶼橋現焚其
 船又攻陳洲獅子山觀音山諸地身經數十戰破漸山
 等十九寨海澄縣孤懸海上提軍段某被賊引海水覆
 其軍遂為賊巢大兵進搗現乘桴深入殺賊頗多海澄
 既復又隨將軍取廈門金門凱還以功授部劄守備二
 十年授左都督二十二年以左都督管四川夔州協遊
 擊事仍帶餘功五次二十九年管南城守營叅將事三
 十六年管湖廣寶慶協副將事皆帶餘功如故年如干

十官

張元宸錄送

也春貴字培元本姓也蓋也先之裔康熙二十一年由
 行伍從征福建耿逆攻澎湖十八寨有功耿逆平二十
 二年引

見蒙

賜今姓授福建詔安營游擊加左都督加五級仍帶餘功五次

歷陝西漢風營叅將遷浙江瑞安營副將管總兵事五
 十七年年七十一卒官祭葬如例子承聖承盛承聖字
 希菴由廕生歷官奉天府治中遷錦州府知府入為戶
 部湖廣司郎中以事降澤州府同知解馬甘肅時川陝

總督奏請能吏治軍需者調涼州府同知遷知府乾隆六年以病歸承盛字祈如由山東撫標馬兵授把總歷千總雍正二年保送引

見授藍翎侍衛出為四川成都城守營守備七年遷建昌鎮中

營游擊卒官

趙壽元錄送

陳有功父某山東撫標千總有功由行伍以康熙十八年從征閩寇戮力行間者三年念族兄國興年老以所得劄付贈之國興得授武清游擊有功歸仍以行伍隸撫標又隸登鎮為總兵岳昇龍所器三十二年授萊州營把總擢德州千總以解囚道逸禡職會昇龍由天津

爾丹奏請有功自隨從大軍至四十一臺凱旋還四川總督有功隨往三十六年授松潘把總歷千總遷龍安營守備奉檄征打箭爐奮勇爭先率兵由張谷塞赴瀘水西取大岡數戰皆捷四十一年叙功遷永寧協標右營游擊擢山西偏關叅將未行連遷浙江樂清副將福建汀州鎮總兵官三月三遷有功感恩益自奮立碑自述生平不欺人歷險阻不變節雍正五年年如千卒

賜祭葬贈都督同知子某以廕仕至貴州道

據自述碑

戴璠字魚若其先蓋州人世為武職父聖聰官江南副

使居濟寧璠遷於縣康熙八年舉順天鄉試十五年成
進士以父母年老不謁選久之授太常博士於行戶無
所科率遷兵科給事中旋掌工科印上疏陳馬政屯田
切中利弊皆報可江西知縣黃某領憑一年未之任其
人頗有所倚恃璠糾叅之人服其敢言二十五年典河
南鄉試號得人連丁內外艱服除補原官稽察寶源局
兩掌登聞鼓遷奉天府丞督學政擢通政司右叅議俄
遷太僕寺卿奉

命祭告舜陵以老子告五十八年卒年八十璠外舅王愍愍先
後贈璠不下萬金及王罹禍以所積盡付其家子六人

第四曰文諦拔貢生教習期滿候選知縣好施予江南
陳某者嘗游於京師後流寓濟南厚卹之送歸里文諦
子煌以州同署武陟縣丞有能名第五曰諫康熙己酉
年舉於鄉授內閣中書舍人善筆札

朱彤
採訪

張世祺字肇祥其先河間人明成化間徙濟南六傳至
世祺舉康熙十一年鄉試久之選蓬溪知縣縣徵糧舊
有浮費世祺豁除之為勒石紀其事三十八年分校四
川鄉試所取半知名士四十一年大軍征打箭爐檄世
祺收散軍糧備歷險峻以勞績著事平行取工部營繕
司主事管寶源局督修瑠璃河有功遷都水司員外郎

四十八年考選授掌山西道監察御史巡視南城上疏言今刑官於重案不能速行審擬以致囹圄壅積聞現收刑部獄者多至一千三百七十餘人地狹不能卧皆排立今當溽暑稔惡鬱蒸不能保無疫癘請飭速為清理其罪輕應發遣及牽連者宜即發遣或釋放俾無淹滯并通行各省以此清理報可得釋者數百人五十年轉江南道歷掌山東陝西河南諸道掌登聞鼓疏劾福建督撫朦溷成獄其畧曰福建解到盜陳五顯等二十二人有司擬置大辟臣與監察御史董宏彪赴刑部審三日竟有與原揭懸絕者二十二入今實二十人惟五

人實經審訊餘十五人有在獄從未訊者有縣府雖審而院司未訊者亦有拷至六七次未承者虛懸定罪其草菅人命尚忍言哉又馮秘者一無鬚少年自稱二十歲而原揭註四十九李瑞自稱六十三蒼顏白髮原揭註四十一若問官果皆親鞫有如是之顛倒者乎且有以弟代兄父代子者臣思督撫掌封疆臬司總刑名守令膺民社遇此重案竟假捏朦溷其何以成信讞乞令法司同鞫若臣言不虛則將諸臣下吏治罪疏上

詔總督范某等自陳得釋者十餘人范遷左都御史以前奏器

世祺謝曰道長教我世祺後以范某薦遷通政使司右

參議年七十致政歸又十年卒

周永年錄送

杜溥字魯菴康熙三十二年援例授襄城知縣縣儒學

遭闖寇後盡圯溥捐俸重修又勸募撤舊城而新之屹

然稱金湯歲旱請於上開廩賑濟東南境多盜捕其魁

置於理餘悉散去時移陝西兵鎮荆襄溥衝風雪僕僕

郊原供億無缺而民不知擾汝水自南門外通江淮商

賈往來民收其利後沙壅水淺舟不得行溥復鑿通之

黃河去襄城三四百里嘗檄夫修築溥力陳疾苦民得

休息任三年縣人作歌頌之

朱彤孫尚採訪

趙于京字豐原其先大興人父士通遷於縣于京廉正

有幹畧康熙三十二年由舉人選城武教諭導率有方

以卓異擢臨潼知縣抵任甫五日理滯獄囹圄為空地

當孔道官馬或不敷民間舊有貼馬錢于京盡革之任

佑中者縣巨猾也構訟稍不如意閉村堡奮臂抗官養

健兒為爪牙前官莫可誰何于京圍其家擒黨與十數

人佑中遁京率卒襲捕之置於法渭水沒田萬餘畝民

逋賦累千金代輸之而去其籍遷綏德州知州臨潼老

幼提挈送者盈街巷多至泣下四十一年至綏德有飭

報墾田起租之檄他州縣承上官意率多報以邀功于

京獨默然若無事吏請至再三叱曰國家太平六十年

尚有未墾地乎且延綏傍山多沙磧雨少不繼則成石田耳堪增稅以困吾民耶竟無所報四十二年

車駕西巡于京扈

蹕至華陰

召見奏對稱

旨命講周易賦詩

賜御書授河南知府數月丁母憂無以治喪河南巡撫徐潮賻

之乃歸會潮入覲

上問豫

省循吏潮以于京對因奪情復任于京乞假營葬畢始行洛陽南村有雕木為佛像者藏機於內使耳目至

皆動謂之活佛惑愚民為姦利于京焚其像而杖之妖言頓息盧氏山有礦洞四方無賴子鳩衆擅開架屋為村舍具什器勢漸熾不能禁于京選能吏協營弁率衆焚其巢決山渠水以灌洞事乃定宜陽民喬宗仁飾博具誘人財無以償有致之死者于京立斃之作新建倉初奉

旨勘三

門議貯漕糧事宜于京上議其畧曰近河倉廩相傳在鞏縣者為隋洛口倉即漢成臯地陵谷變遷遺址無存

其南阜者險峻低平者陰濕多沙勢不可建陝州西南六里舊有隋建太原倉又陝州之集津倉唐開元置於

三門以集漕運遺蹟皆莫可考惟州城內地塏爽而臨河且已過三門之險建廩於此密邇汾渭甚便後既定於河南府城建倉復上議以為功大費繁非可猝就當預籌者三事上官採其議貯穀得無悞四十五年商雜賊萬餘據山連盧氏閩鄉界郡城戒嚴懷鎮門某率精甲五百來會乃偵訪通賊要路分守三十餘所賊知有備竟不敢犯境會大雪喜曰賊降矣或請其故曰山中無宿糧所恃以苟延者刳遠村耳當此嚴寒能荷戈履冰行乎後五日得潼關檄果如所料守河南前後凡四年遷蘇州知府疾作未之任卒年五十六于京性尚忠

古文學其官城武修文亭山曾子祠漢忠臣佗侯廟於臨潼表渾太師段太尉墓新其廟立樊舞陽祠修橫渠書院與李顥王心敬相友善使二子從顥受學於綏德建韓蘄王祠於河南建狄梁公祠新天中書院所在捐俸修孔子廟諄諄以課士為務去後人皆思之

訪

何永盛採

高經世字寧遠康熙三十一年由歲貢任諸城訓導歷金鄉訓導四十三年奉檄賑蒙陰沂水二縣民蒙實惠胥吏無所侵蝕越數歲民為製衣帽送至家以老歸年九十餘卒

黨其超採訪

張光祖歷城人康熙三十八年知萬州揭先勞二字於退食齋徵收錢糧立分限程期民不擾而鮮逋賦州多陂塘洪口陂為利最大光祖嚴疏濬潤田數千頃歲凶無憂祀名宦廣東通志
逮選字萬青其先章邱人自莆田知縣甲遷於縣四傳至選聰敏有智畧由長清諸生拔入成均廷試第一補八旗教習康熙四十二年

車駕東巡選獻賦

命直南書房兼恒親王講官時

世宗在藩邸書賜慈闈燕喜額為其母壽充佩文韻府纂修

書成授上高知縣五十三年入外簾經題稍僻士昂沸監臨官計無所出選細為解釋乃帖然閱卷決文字中否揭榜皆如其言以卓異遷霸州知州選因畿甸多水患日考諸河源流及其道之通塞隄防之修廢圖藏笥中及雍正四年

上命開水利營田

府怡賢親王主其事以選諳水道奏請離任

專理河工所繪圖經進蒙褒嘉晝夜經畫以勞績擢保

定同知因分貼上高倉穀去官乾隆八年年七十八卒

子天鷹以貲授安州州判遷祁州州同張廷棟探訪

鍾輓字德輿其先宛平人父性樸官山東提學副使愛

濟南山水因築室金線泉家焉輓承家學砥行好義年
 十七父歿家計蕭然重趼走千里啟祖父母柩同營葬
 聞者難之由拔貢授泗水教諭釐正文體多士翕然向
 風以疾歸年三十五卒弟轅字聖輿事母趙有孝聲兄
 沒善撫其孤學詩於新城王士正由拔貢考充鑲藍旗
 教習授桂平縣知縣地屬苗疆轅化導有方獠民帖服
 康熙四十九年卒官幾不能殮

鍾勳錄送

余肇松字茂嘉其先會稽人自其父遷於縣康熙五十
 四年茂嘉由監生援例授太倉州知州逐姦胥獲巨盜
 政聲甚著開覺寺僧無念者結豪右淫良家婦女鄉民

無敢忤者茂嘉佯不問一日誘至署杖殺之士民歡呼
 好事者為作蓮花報傳奇流播江南北不二年以疾歸

劉士愚採訪

楊瑄字公璧父天奇自洪洞遷於縣見一行傳天奇二
 子長璋次即瑄由諸生援例為中書科中書舍人改雲
 南府通判與知府某論事不為屈上官廉其直表署陸
 涼州知州陸涼為古夜郎地西連霑益東接羅浮猓蠻
 不時出掠瑄執其渠魁餘黨遁去州旁有灌田水口久
 為隣封所侵瑄請於上官復之民以時蓄洩享其利以
 終養歸年七十四卒子士昌仕贛榆知縣兄子大中

劉士

愚採訪

大中字靜函父璋援例授通判職七子皆貴大中其長也年十九孤諸弟皆幼大中友愛甚至為延師督課至於成立雍正二年大中以貢生由第七弟大立保舉授穀城知縣敦教化免民間一切科率衙齋蕭然如寒士其年秋江水暴發高數丈不及城者數武舉縣倉皇大中夜朝服跪禱泥淖中水忽退士民感德為立碣曰楊公拜水處任一年卒官縣人爭賻之泣送其櫬以歸弟大勳大凱大紳大立

劉士愚採訪

大勳字彤一由貢生教習授虹縣知縣歷任山陽阜寧

徐州直隸州知州署太平知府大勳事母以孝聞居官時夜蔬食能甘淡泊嗜書得舊本必補綴鈔寫以為樂積至數千卷示其子嘉樹曰三十年宦囊盡此矣吾不能效陸賈貽汝橐中金也著文選音義未竟卒年七十一

劉士愚採訪

大凱字又蒼偉軀幹挽強善射雍正元年武進士由御前侍衛轉達出補溫州水師營遊擊改處州中營遊擊歲餘擢潞澤營叅將會準夷逆命

上命寧遠大將軍某備邊北境選良將勁卒從軍而大凱以本

職應選

心者十大凱獨稱

旨加永副將銜遂從大將軍出塞常為先鋒以勇畧著抵鄂爾坤扼虜之衝建受降城大凱董其事尅期而竣賊約期偽降乘隙襲我軍右師失備將潰大凱時領左師率鐵騎橫擣之賊乃退時兵糧例日給三合餘眾苦飢無敢為大將軍言者大凱請增至八合五勺士卒飽騰各營解火藥至軍卒私鬻於路易泥沙臨陣礮不發或諧之曰楊副將所解也大將軍怒呼詰之將徇於軍大凱從容言曰某有標記請驗之伏法無恨驗之大凱所解藥獨良初大凱戒軍吏書其封曰山西潞澤營軍吏或

歷城縣志 卷第二十八 國朝

以為無庸至是賴以免禍和布多之役天大霧咫尺莫辨大凱度敵已近發礮一擊遂進破其眾降之凱旋論

功第一擢寧夏鎮掛印總兵官以地震免卒於家年如

千大凱號令整肅倉猝不可撼塞外食貨倍值大凱教

以節縮營買採植為持久計奏捷後惟潞澤營歸有餘

財性縝細軍中或苦之號為楊碎碎云

張敬錄送

大紳字宜書府學生雍正七年由兄大勳保舉發雲南

以州判試用上官委城烏蒙竣工值猥叛又委署宜良

督運糧餉皆及時猥平委留養難民大紳招徠安輯給

衣食藥物全活者甚眾授巧家營經歷遷昆明知縣其

歷城縣志 卷第二十八 列傳四

地金汁銀汁二河歲久淤塞大紳請挑濬以利民運銅
 北上道聞母喪歸服除補銅山銅山為江左劇邑黃河
 繞城而下又連歲蝗旱大紳請緩征甦民困乾隆十八
 年九月河決張家馬路數百丈督撫河院畢集河干議
 北岸挑引河分水勢大紳首挑千五百餘丈總督鄂公
 甚嘉之專摺保題明年委督商山堰石工四閱月而竣
 李家樓河岸復報險大紳適往築塞受濕熱致疾卒工
 所年六十同
 大立字華如年十六舉康熙五十九年武鄉試第一明
 年以第二人及第選

御前侍衛雍正元年遷

乾清門頭等侍衛二年授廣東提標中營參將仍帶孔雀

翎子陞四川化林協副將六年加總兵銜隨吏部尚書

查郎阿征西藏阿爾布巴等踰雪山渡瀘水深入賊地

有功事平駐防泰寧建城十一年隨定邊大將軍平郡

王勦準噶爾乾隆元年授直隸督標中營副將歷張家

口副將浙江金華協副將十三年遷江西南昌鎮總兵

官所轄江山險峻條奏防汛數事皆允行十五年因巡

邊染瘴氣告歸十六年病痊授陝西河州鎮挂印總兵

官鎮西連番地袤延數千里回部雜處號點悍難治所

理三營諸將多草菅峇命不加撫卹大立奏免游擊都司各一人鞭守備千總數人諸將始戢值伊犁用兵羽檄旁午日夜靡定疾復作十九年三月卒於軍年五十四祭葬如例大立幼穎異好作詩善擘窠大書軍務之餘日揮數十紙於聲伎貨財無所好遇之循循若書生而任封疆三十年皆鎮靜有幹濟云

劉士愚採訪

高山字居東雍正元年進士改庶吉士授編修歷御史給事中出巡臺灣有惠政考滿當代遇番變設備捍禦獲賊千餘人賊偵知阻海無援仍糾眾圍城不解者數日忽有二三千人持棍奮擊賊少却山以兵繼之大捷

司其人乃民間變急趨救者山更宣布

朝廷威德皆投誠歷按察使遷福建布政使以劾免弟對

朱彤採訪

對字龍門由諸生保舉授隴西縣丞遷浮山知縣張某者誣人為盜云於月下識其人對察其冤而張不服乃於望夜張燈雜跪其人於庭使張認之良久不能辨冤乃雪曲陽馬氏婦控項成王二等輪姦獄已上巡撫察有冤色俾對覆勘對至姦所見鄰舍鱗次詰曰豈有貞女拒姦大聲疾呼而人無救者馬語塞乃吐實所私詹某與項等有隙教之控也所活成等十三人調大同值

歲饑前令匿未報積屍滿野對三請發粟賑之對善折獄人不敢欺以面黑呼鐵面青天終潮州府知府朱彤採訪

李治國字亮公世居杏園村康熙五十七年進士授寧都知縣勸輸社倉有法為一省最用巡撫薦發福建以知府用署汀州府值水患減糶民得不饑修復隆江書院士大悅雍正五年補邵武府歷漳州延平二府皆有聲以謗去官留辦滇銅歲事授平原州知州以母老陳情改鄧州治國感恩益勤於吏事州境刀水嚴陵水汎溢不時治國請修隄資捍禦刀水自新店鋪至太孫莊六十三里嚴陵水自上高粱至趙河口六七十里皆親

督畚鍤晝夜不懈建同文書院祀范文正公鄧人感德

即其旁為建生祠乾隆五年請養歸居數歲卒年七十

一朱彤採訪

沈士英字翰宸父維鼎由錢塘遷於縣雍正間士英以貴授崑山知縣改舞陽嘗杖殺巨盜總督田某稱其能調繁商邱鄉官有虧帑者事甚急士英善為區處以事鐫一級引

見奏對稱

旨擢刑部主事遷負外郎山東饑命勘事竣以巡撫岳濬薦遷

河南司郎中年五十一卒官沈佐清錄送

列傳四

黃曾字省齋弱冠補諸生由捐貢授金鄉訓導善教士
 雍正四年改選發河南以知縣用補光山歷福建之福
 安海澄連江漳浦諸縣所至興教化察疾苦勸開墾民
 賴以殷足漳浦俗輕生好鬪感其誠惡習頓革丁母憂
 歸服闋乾隆十九年舉鄉飲大賓未及行禮病卒年七
 十一

劉士愚
採訪

馮秉仁字體元其先杭州人自父繼祖籍於縣秉仁生
 九歲能背誦五經十四歲補運學諸生試官器異之乾
 隆元年舉鄉試明年第進士改翰林院庶吉士授編修
 五年稽察右翼宗學事務六年冬輪進經史講義

召見養心殿問疏中所引典故皆條晰以對

天顏霽悅且為指示文義所未盡者七年遷侍讀稽宗學如

故八年擢浙江道監察御史歷署陝西山東諸道九年
 新葺翰林院落成

賜宴十一年瀛臺

賜宴皆與賦栢梁體詩十二年副刑部侍郎錢陳羣典江西

鄉試悉心甄別十三年巡視北城未數日轉兵科給事
 中巡視北城如故折獄精當而出以和平不事刑扑曲

直自判旋以疾卒年三十九

程世驥
錄送

曾尚增字謙益宗聖六十六代孫也其先嘉祥人後遷

於縣之鑛村而注籍長清尚增工制義敏察世事顧務為篤厚無圭角乾隆二年成進士改庶吉士授蕪湖知縣賑饑無弗遍捕蝗萬頃湖蝗盡而民不擾擢廣德州知州丁內艱補平定州丁外艱補郴州三州皆直隸尚增俱有惠政在平定柳修學宮建義塾勸民墾田康德民爭河水經三官五年不結尚增親勘兩造村民各數百人來偵聽立如堵牆勢洶洶訟負將死鬪尚增以數健卒夾其魁與周視形勢開導明切其魁內媿叩服餘黨散去又千總吳某多力而戇得罪捕急登閣上飛瓦不肯下守備將發兵圍之尚增曰是激變也至閣下數

言吳東手下就理其臨事有識類如此乾隆二十三年冬柳署內室不戒於火妻張及次女皆焚死語在列女傳尚增自是委頓多病遂解組又二年卒於柳之館舍

年五十三

韓燭張廷棟採訪

劉應麟字軒來其先慈谿人父某遷於縣應麟少補運學諸生有聲士林第乾隆二年進士授壽陽知縣署屯留革里下科率調靈石絕苞苴嚴條教值歲旱步禱於介之推廟距城五十里將至廟大雨如澍是秋倍收十三年金川用兵日需馬八十匹又督治雲梯皆無誤而民不擾解組日囊橐蕭然民送者多泣下應麟未仕前

授徒齊河馬氏歸仍館其家從遊甚盛晚年終日靜坐
嗜禪理三十二年一夕無病卒年七十五劉士愚錄送
李翎字良輔其先洪洞人遷於縣五傳至翎弱冠補諸
生有文名援例授戶部陝西司員外郎慎於其職簡通
州倉器具敝壞而內務運糧無水脚役者修整為累翎
乃自出資應之役始不病事竣遷刑部江西司郎中嘗
語同官曰凡成讞皆經督撫府縣數訊而後達部苟非
實有疑竇而經駁覆鞫其貽累恐有不忍言者幸勿有
成見必以平反為能也人以為名言移病歸又三年卒
兄偉字觀我事繼母以孝聞途遇賈人被盜失百金將

自盡偉贈如其數以武舉終

汪居敬朱彤鄭銘採訪

汪航字仙木其先臨清人父錫修始遷於縣年十八補
諸生雍正間援例授松江府通判司捕盜賊能盡其職
諸生某糾修橋梁鄉官與有隙者誣以葺舍盜官石訟
不解知府周俾航鞠之航親至泖湖周視力為漭雪生
獲全上官委令押運先是糧艘行漕河每為商賈患航
嚴飭旗丁俾分風孽流魚貫以進於客舟無所擾會太
倉旗丁有與民易錢相諍者航以未報免官年七十一

率

朱彤鄭銘採訪

崔雲會字萬清乾隆十四年由舉人發安徽以知縣用

署廬州通判安慶同知理差務不擾民署蒙城旋補涇
 縣縣人好訟雲會力懲之坐蒙城事降調十八年發江
 蘇勘山陽安東賑務按戶稽視期於無遺事竣補吳縣
 縣丞捐復知縣歷署太平同知廣德州判舒成阜陽諸
 縣在阜陽捕獲巨盜有能名又署英山裁汰花稅民德
 之補當塗未之任卒

張蕃
採訪

歷城縣志卷第三十八終

歷城縣志卷第三十九

列傳五

儒林

前史以傳經者列儒林能文章者列文苑縣中操觚屬
 簡之士彬彬盛矣而傳經者蓋少予徧剔載籍僅於漢
 得四人魏一人明二人雖世代相懸出處異致然皆深
 於經義承師授徒非空談性命之學者比也伏勝號濟
 南生而墓在今鄒平境故弗及焉作儒林傳

漢

張生濟南人與歐陽和伯同授尚書於伏生張生為博

士以授夏侯都尉都尉傳族子始昌始昌傳勝勝傳從
兄子建由是尚書有大小夏侯之學見前漢書儒林傳

林尊字長賓濟南人事歐陽高受尚書為博士論石渠
後至少府太子太傅授平陵平當梁陳翁生由是歐陽
有平陳之學同上

徐巡濟南人師事衛宏又從杜林受古文尚書以儒顯

見後漢書儒林傳

按巡時所謂古文尚書者孔安國正本也非梅賾
之偽古文尚書

吳進字升臺東平陵人後漢時孔宙門生宙治嚴氏表

秋而進為其門生蓋傳經之士見孔宙碑陰

按歐陽公集古錄跋尾漢世公卿多自教授聚徒
常數百人其親受業者為弟子轉相傳授者為門
生故朱氏經義考列吳進於承師條下

魏

劉熹字德怡濟南人三國魏時為下陰縣令博學好古
立碑載生徒百餘人其不終業而夭者因葬其地號曰
學生墳凡授尚書禮記孝經儀禮左傳易詩者各若干

人見水經注及集古錄

明

殷峻成化十六年舉人家世傳禮經靈寶許氏遣二子
 誥瓚從學誥至戶部尚書讚至大學士後卒業太學與
 襄垣劉氏同舍劉二子龍夔從學龍至兵部尚書夔至
 都御史一時言禮者奉為山東大師孫士儋以禮經登
 第仕至大學士自有傳據李攀龍葛守禮
于慎行諸公文集

張潭字德深高祖思信自有傳潭有學行著聲諸生間
 提學道陳鎬脩闕里志擇諸生博雅者分纂首屬潭四
 方從游者先後七百餘人殷士儋李攀龍最知名攀龍
 從以受毛詩於其卒為文以祭推尊甚至士儋表其墓
 謂潭操行端謹平居無戲論情容教人隨材誘掖務收

其放心又謂潭絕意科舉之學日與門人究古禮冠婚
 喪祭飲射諸儀士大夫家皆質之而後行故濟南漸習
 禮俗其沒也士無所質疑遂多猥佻趨簡陋云嘉靖三
 十年年七十三卒學者稱三山先生據墓
表

十年年六十
 斷谷其幾也士
 身祭為恨齋謝士大夫
 其效必又罷戰然意林舉之舉口

歷城縣志卷第四十

列傳六

文苑

環城之山廉削筍立其水源清而流長故生其間者類
 皆磊砢奇偉蔚然以文詞耀於時歷檢史冊何其多也
 終軍辛棄疾張養浩諸人皆以事功掩其文學予所臚
 員平原而下已指不勝僂矣李易安以弱女子為詞家
 不祧之祖邊李主盟中夏而接武嗣響紛起里閭間至
 於今不絕山川之靈其正有發之不竭者耶作文苑傳

唐

員半千字榮期齊州全節人其先本彭城劉氏十世祖
凝之事宋起部郎及齊篡位奔元魏以忠烈自比伍負
因自姓負終鎮西將軍平涼郡公半千始名餘慶生而
孤為從父鞠愛羈州通書史客晉州州舉童子房元齡
異之對詔高第已能講易老子長與何彥先同事王義
方以邁秀見賞義方常曰五百歲一賢者生子宜當之
因改今名凡舉八科皆中咸亨中上書自陳臣家貲不
滿千錢有田三十畝粟五十石聞陛下封神岳舉豪英
故鬻錢走京師朝廷九品無葭蓂親行年三十懷志潔
操未蒙一官不能陳力歸報天子陛下何惜玉陛方寸
地不使臣披露肝膽乎得天下英才五千與推所長有
一居先臣當伏死都市書奏不報調武陟尉歲旱勸令
殷子良發粟賑民不從及子良謁州半千悉發之下賴
以濟刺史大怒囚半千於獄會薛元超持節渡河讓太
守曰君有民不能恤使惠出一尉尚可罪耶釋之俄舉
岳牧高宗御武成殿問兵家有三陣何謂耶衆未對半
千進曰臣聞古者星宿孤虛天陣也山川向背地陣也
偏伍彌縫人陣也臣謂不然夫師以義出沛若時雨得
天之時為天陣足食約費且耕且戰得地之利為地陣
舉三軍士如子弟從父兄得人之和為人陣捨是則何

以戰帝曰善既對策擢高第歷華原武功尉厭卑劇求
為左衛胄曹參軍使吐蕃將行武后曰久聞卿名謂為
古人乃在朝耶境外事不足行宜留待制即日詔入閣
供奉舊唐書云嗣聖元年半千為左衛長史遷司賓寺主簿與邱悅王劇
石抱忠同為宏文館直學士又與路敬淳分日待制顯
福門下因撰明堂新禮三卷上之武后封中嶽又撰封
禪四壇碑十二首以進武后稱善前後賜絹千餘匹長
安中累擢正諫大夫兼右控鶴內供奉半千以控鶴在
古無有而授任者皆浮俠少年非朝廷進德之選請罷
之忤旨左遷水部郎中預脩三教珠英會詔擇牧守除

棣州刺史復入宏文館為學士武三思用事以賢見忌
出濠蘄二州刺史半千不顯任吏常以文雅粉澤故所
至禮化大行睿宗初召為太子右諭德仍學士職累封
平原郡公表丐骸骨有詔聽朝朔望半千事五君有清
白節年老不衰樂山水自放開元九年遊堯山沮水間
愛其地遂定居卒年九十四即葬焉吏民哭野中孫倂
開元間召能言佛道孔子者答問禁中倂方九歲升坐
詞辨注射帝異之曰半千孫固應爾新唐書本傳
參舊唐書按舊唐書文苑傳半千開元二年卒與新唐書異
未知孰是

唐奉一齊州人趙明誠錄其所書中宗聖教序又引御
史臺記謂奉一善書翰武后時為御史後坐誅翦皇族

廢據金石錄

宋

李冠字元伯齊州歷城人舉進士不第得同三禮出身
調乾寧主簿師事臨淄賈同同沒冠私諡曰存道先生
范諷為淄州通判就見王樵冠寄詩美之以文學稱京
東與定陶劉潛齊名卒有東臯集二十卷據宋史文苑傳及澠水燕

談錄

按李冠舉進士不第而景日昉說嵩所錄嵩陽書

院石柱題名有曰進士李冠皇祐二年三月二十
六日遊是三禮出身者亦得稱進士也又文獻通
考亦曰齊州李冠與宋史同而天禧二年長清縣
重脩廟學記作趙郡李冠蓋署郡望耳岳通志又
謂冠卒於官亦不知何據

李格非字文叔濟南人幼甚俊異有司方以詩賦取士
格非獨用意經學著禮記說至數十萬言遂登進士第
調冀州司戶叅軍試學官為鄆州教授郡守以其貧欲
使兼他官謝不可入補太學錄再轉博士以文章受知
於蘇軾常著洛陽名園記謂洛陽之盛衰天下治亂之

候也其後洛陽陷於金人以為知言紹聖立局編元祐章奏以為檢討不就戾執政意通判廣信軍有道士說人禍福或中出必乘車叱俗信惑格非遇之途叱左右取車中道士來窮治其姦狀而出諸境召為校書郎遷著作佐郎禮部員外郎提點京東刑獄以黨籍罷卒年六十一格非苦心工於詞章陵轢直前無難易可否筆力不少滯其為文劉後村謂條鬯有義味在晁秦之上嘗論左馬班范韓之才語奇而確又謂文不可苟作誠不著則不能工且晉人能文者多矣至劉伯倫酒德頌陶淵明歸去來辭字字如肺肝出遂高步晉人之上其

誠著也妻王氏拱宸孫女亦善文子迥南渡後任勅局

刪定官女清照

據宋史文苑傳墨莊漫錄文獻通考金石錄後序

按宋史不載格非子姓而清照金石錄後序云有弟迥故知為格非子也格非所作廉先生序石刻在章邱之繡江後有兄子迥跋稱先伯先考先叔因知格非有二兄惜其名不傳耳

清照自號易安居士幼有才藻長嫁趙明誠結褵未久明誠即負笈出遊清照書詞錦帕送之嘗以所作詞函致明誠明誠嘆息媿弗逮謝客忘寢食者三日夜得五十闕雜清照詞示友人陸德夫德夫稱絕佳者正清照

作也其舅挺之相徽宗清照獻詩有云炙手可熱心可寒挺之排元祐黨人甚力格非以黨籍罷清照上詩救格非有云何況人間父子情識者哀之明誠好儲經籍及三代鼎彝書畫金石刻連知萊淄二州竭俸入以事鉛槧清照與共校勘明誠作金石錄考據精確多足正史書之失清照實助成之靖康二年春明誠奔母喪於建康半棄所藏其年十二月金人陷青州火其藏書十餘屋明誠諸城人而家於青也建炎二年起復知建康府三年召知湖州至行在病卒清照自為文祭之既葬清照赴台州依其弟迓輾轉避難於越衢諸州紹興二

年又赴杭州所攜古器物以次失去乃為金石錄後叙自述流離狀甚可憐憫是年五十一矣後適張汝舟頗自悔流落江湖間以卒清照為詞家太宗嘗謂詞自唐五代無合格者宋柳永雖協音律而語塵下張子野宋子京兄弟沈唐元絳晁次膺有妙語而頗碎晏元獻歐陽永叔蘇子瞻所作似詩之句讀不葺者蓋詞別是一家知之者少晏叔原賀方回秦少游黃魯直能知之晏苦無鋪叙賀少典重秦專主情致而少故實黃尚故實而多疵病世以為名論

據宋史文苑傳金石錄後序及晁氏讀書志卿環記諸書

田逸民濟南人長於墨竹宣和畫院人其所作極美觀

多作歌風冒雪帶雨含烟之狀鄧椿畫繼

按四朝詩選有濟南呂同老詩惜其事不可考不能為之傳也姑附於此

金

李之翰字周卿濟南人宋宣和末第進士人有勸叅童貫可以徑至館職者之翰謝不往金兵破洛州之翰被縛見帥語及君臣之際情辭慷慨帥憐之遂被錄用守寧州陷侍郎田珏黨除名徙上京遇赦復官終於東平州判官之翰工詩元好問稱其學有淵源東州詩人未見其比獨其在洛州未知何官子謙靈石尉據中州集及遺山詩

集

王繪字質夫濟南人天會二年進士仕至太常卿嘗注李白詩其武陟道中詩頗稱於世中州集

按王繪撰大聖院碑署曰少中大夫保德州刺史兼知軍州事以碑文所述考之繪乃皇統九年進士非天會二年且碑作於大定二十八年若登第在太宗天會二年則距作碑時六十七年不應如是之久也

劉昂字次霄濟南人承安五年進士調鄆縣令同官劉光甫稱其高材博學詩時有佳句云同上

按金史文藝傳別有劉昂興州人與此無涉堯山堂外紀云劉昂字之昂興州人大定十九年進士又有劉昂字濟霄者以先有劉昂號小劉之昂據此則次霄一作濟霄而小劉之昂之字或是衍文元

張起巖其先章邱人五季避地禹城高祖廸以元帥右監軍權濟南府事徙家濟南當金之季張榮據有章邱鄒平諸縣地歲丙寅歸於元太祖廸與子福先後翼之始終能效忠節福仕為濟南路軍民鎮撫兵鈐轄權府事生東昌錄事判官鐸鐸生四川行軍儒學副提舉範

範生起巖起巖母邱氏有娠見長蛇數丈入榻下已忽不見乃驚而誕起巖幼從父學年弱冠以察舉為福山教諭值縣官捕蝗移攝縣事聽斷明允其民相率曰若得張教諭為正縣尹吾屬何患焉政成遷章邱登延祐二年進士第一除同知登州事特旨改集賢修撰轉國子博士陞國子監丞進翰林待制兼國史院編脩官丁內艱服除遷為監察御史中書叅政楊廷玉以墨敗臺臣奉旨就廟堂逮之下吏丞相倒刺沙疾其摧辱同列悉誣臺臣罔上欲置之重辟起巖以新除留臺抗章論曰臺臣按劾百官論列朝政職使然也今以奉職獲戾

風紀解體正直結舌忠良寒心殊非盛世事且世皇建
臺閣廣言路維持治體陛下即位詔旨動法祖宗今臺
臣坐譴公論杜塞何謂法祖宗耶章三上不報起巖廷
爭愈急帝感悟事乃得釋猶皆坐罷免還鄉里遷中書
右司員外郎進左司郎中兼經筵官拜太子右贊善丁
外艱服除改燕王府司馬拜禮部尚書文宗親郊起巖
充大禮使導帝陟降步武有節帝甚嘉之賜賚優渥轉
叅議中書省事寧宗崩燕南妄男子上變言部使者謀
不軌按問皆虛法司謂唐律告叛者不反坐起巖奮謂
同列曰方今嗣君未立人情危疑宜亟誅此人以杜姦

謀趣有司具獄都人肅然大事尋定中書方列坐銓選
起巖薦一士可用丞相不悅起巖即攝衣而起丞相以
為忤已遷翰林侍讀學士知制誥兼脩國史脩三朝實
錄加同知經筵事御史臺奏除漕西廉訪使不允已而
擢陝西行臺侍御史將行復留為侍講學士拜江南行
臺侍御史召入中臺為侍御史轉燕南廉訪使搏擊豪
強不少貸貧民賴以吐氣滹沱河水為正定害起巖論
封河神為侯爵而移文責之復修其隄防淪其湮鬱患
遂息陞江南行臺御史中丞拜翰林學士承旨知制誥
兼修國史知經筵事右丞相別怯里不花為臺臣所糾

去位未幾再入相諷詞臣言臺章之非起巖執不可俄拜御史中丞論事剴直無所顧忌與上官多不合詔修遼金宋三史復命入翰林為承旨充總裁官積階至榮祿大夫起巖熟於金源典故宋儒道學原委尤多究心史官有露才自是者每立言未當起巖據理竄定深厚醇雅理致自足史成年始六十有五遂上疏乞骸骨歸後四年卒諡文穆起巖面如紫瓊美髯方頤而眉目清揚可觀望者欽其雅量臨政決議意所背鄉屹若泰山不可回奪或時面折人面頸發赤不少怒廟堂憚之識者謂其外和中剛不受人籠絡如歐陽脩名聞四裔安

南脩貢其陪臣致其世子之辭必候起巖起居性孝友少處窮約下帷教授躬致米百里外以養父母撫弟如石教之官學無不備至舉親族勿克葬者二十餘喪且買田以給其祭凡獲俸賜必與故人賓客共之卒之日廩無餘粟家無餘財起巖博學有文善篆隸著述甚富

子二人琳琛

節元史本傳

潘昂霄字景梁號蒼崖濟南人世以文學顯元初為文者氣萎薊不振昂霄采秦漢及唐宋諸大家文以為金石例講明體制制士經其指授者皆有法度歷事六朝官至翰林侍讀學士通奉大夫卒諡文僖子敏中敏中好

賢下士文雅有父風至正間為饒州路推官嘗平冤獄
有神蛇之異天台陶凱作詩曰潘侯理獄市雪冤類神
明又曰蛇兔涉幽怪事近猶足徵

見金石例序及林某江西通志

按金石例有其子誦跋事在至正五年同時作序
者皆稱敏中疑敏中即誦之字也但舊志云誦官
江西提刑理問與江西志異姑闕以俟考

李國鳳濟南人至正十年舉鄉試第一十一年舉禮部
第一次趙麟時號鳳麟榜廷試三甲第三其歷官可
考者十四年為翰林國史院編修官十八年由治書侍
御史同中書叅知政事普顏不花經畧江南二十四年

為中書叅知政事二十六年為左丞史不為立傳而所
撰張宓神道碑及移濟寧路治記條達有法度元好問
馬祖常數人外不能過也

據元詩選及各碑

按國鳳所作張宓碑有云先兄御史君其名字不
可考

張謙字受益號古齋濟南人博學鑒古嘗為江浙行省

檢校

朱存理鐵網珊瑚

吳志淳字主一以字行濟南人工詩善草隸以父廕歷
官靖安都昌二縣簿元季棄官寓鄆之東湖至正末執
政奏除待制翰林命下為權倖所匿志淳已在耄耄若

不聞焉其詞章翰墨人得之不啻拱璧

成化四明郡志

按吳志淳濟南人見浙江通志而明詩綜作無為

州人俟考

明

張紳字仲紳一字士行自稱雲門山樵亦曰雲門遺老

濟南衛人少從事戎馬間洪武中禮部主事劉康薦其

明經老儒達於治體可備顧問十五年驛召至京授鄆

縣儒學教諭十七年十二月以通政使蔡瑄薦擢都察

院右僉都御史十八年授浙江左布政使紳有才幹不

屑屑於世事慷慨激烈詞辨縱橫終日疊疊不休五六

小篆精於賞鑒法書名畫多所品題撰法書通釋一卷

詩格清健若不經意而自成一家朱彝尊明詩綜謂齊

東自周公謹後復有此人

據實錄及列朝詩明詩綜陸通志舊志

按陸通志載張紳濟南人舊志謂濟南衛人實錄

謂登州人蓋紳本登州人而籍於濟南衛也陸志

又云以勇略薦而實錄云者儒明初薦舉以耆儒

為最重紳與鮑恂余銓張長年同徵而紳後至恂

銓長年皆授文華大學士恂等力以老疾辭乃放

歸田里而獨用紳可謂曠典矣紳詩載於列朝詩

集明詩綜者皆琅然可誦鄉人為詩在邊華泉先

者紳也漁洋好表章鄉前輩乃無一言及之何哉
 周溥字宗大世次詳子秀傳景泰七年舉鄉試第一由
 教諭遷元氏知縣生平無他嗜好惟積書至數千卷遂
 自號書樵其為詩文刻苦精融一時咸宗師之年五十
 有九卒卒之日猶談詩不已溥嘗講學於壽陽有張蕙
 者從之游每相與商榷道術俯仰古今他人輒莫測所
 謂一日冒雪訪蕙於系舟山居山之東有碑曰詩人元
 遺山墓溥慨歎久之顧謂蕙曰足下他日倘官吾土亦
 為吾樹三尺石題曰書樵先生墓足矣後蕙果巡按山
 東立碑以誌其事

據墓表

邊貢字庭實號華泉父節自有傳貢生有異質襁褓中
 從祖母王受章句輒成誦宏治八年舉鄉試第四明年
 成進士授太常博士時孝宗重祠事貢駿奔惟謹偶以
 告不與上私語左右曰何不見年少官人耶十八年擢
 兵科給事中會孝宗崩上疏劾太監張諭與太醫劉泰
 高廷和用藥之悞又劾太監苗遠與保國公朱暉都御
 史史琳用兵之失辭義剴切聞者凜然遷太常寺丞以
 不善事劉瑾出為衛輝知府正德五年改荊州時藍鄙
 寇亟飛輓之務貢以身任之民不擾而事集治行為天
 下最六年擢山西提學副使父憂服除起河南提學申

條教勤考校士風大振十二年以母憂歸世宗即位即家起為南京太常寺少卿嘉靖二年晉南京太僕寺卿歷太常寺卿提督四夷館時四夷文體各殊館中諸生無師授貢徵求故譯是正諸文以成一家之學七年轉刑部右侍郎拜戶部尚書皆在南京貢早負才名美風姿所交悉海內名士久官留都優閒無事游覽江山揮毫浮白夜以繼日十年右都御史某劾其縱酒廢職遂致仕歸築萬卷樓於湖上蓄書籍金石古文甚富十一年火幾盡貢仰天大哭曰甚於喪我也遂發病卒年五十七賜祭葬明自永樂後辭尚纖弱貢與李夢陽何景

明徐正卿起而振之號宏治四傑又益以康海王九思王廷相為七才子去廷相以朱應登顧璘陳沂鄭善夫為十才子貢詩清婉和粹稱其為人而縣人為詩者實以貢為首庸子二長翼以廕為太學生官光祿寺丞次習字仲學能以詩世其家貢固廉吏習貧困負薪授徒取給饘粥有詩一卷據李廷相邊公神道碑及明史藁王士正睡足軒詩序王田字舜耕山東濟南人以縣佐請老歸田材敏喜為樂府詞膾炙人口遠近傳播山水學高房山不失矩度

夏文彥圖繪寶鑑

劉天民字希尹號函山父緒自有傳天民少病痞九歲

遇一嫗刺其十指而愈就外傳日記千言隨父讀書京
邸遂通經史年十五補府諸生正德二年舉鄉試九年
成進士父憂歸服除授戶部福建司主事俄調吏部文
選司主事舊例吏部需人非久試者不得調調亦不即
文選天民負重名故其調速而美著讀選便覽雖有益
吏治而時不能行十四年諫巡幸罰跪五日廷答三十
嘉靖元年署本司員外郎二年實授遷稽勲司署郎中
時薛蕙在考功與天民齊名有省中二彥之目三年泣
諫大禮復廷答三十余寬調文選郎中未履任謫戍人
謂寬能吏難其繼天民新繫蒙釋恐不得調已而命下

誠不識皆慶得人天民感知遇大推小補盡秉公剔滯
拔淹甚厭衆望時論嘉靖初掌選夏虞中之執天民之
敏皆僅見者給事中陳某嘗著補衣見部為天民所斥
乃上疏指摘對品調壽州知州給事中趙漢御史戴金
等八上章論救不報凡京官外謫者出都門多以眼紗
自蔽天民過故部部方驗封吏數千咸集有識之者曰
此吾恩主無罪左遷者衆擁之馬不得行天民擲眼紗
於地曰吾無愧於衙門使諸君得見吾面目耳縉紳憐
其去祖餞三日始已抵任值歲饑襁災振乏民無菜色
七年遷南京宗人府經歷八年遷南京刑部廣西司郎

中九年遷河南按察司副使分巡大梁時上命刑部錦
 衣衛鞫河南囚重刑者一千五百餘人得平反者幾七
 百人天民力為多嘗語人曰吾之遺子孫者祇此足矣
 十一年為御史胡某所論以才力不及改四川去汴日
 士民攀泣日夕始出郭十四年考察以冠帶閑住遇恩
 詔致仕歸則日集賓友嘯傲山水間天民詩有風格多
 關時事似杜甫晚年好為詞曲為章邱李開先所稱善
 談論益都黃卿嘗曰同一語出函山口便有意味家居
 二十年巡撫李上章論薦命未下而天民無病卒年五
 十六天民母張娠十二月而生無乳庶祖母章棄其二

子而乳之二子遂天章没天民感其恩為服喪三年子

三長浦府學生後多顯者

據開居集

按壽州志云天民嘉靖四年知壽州崇獎節孝懲
 刈頑梗立鄉社以厚風俗北門石橋久圯增修二
 百餘丈積穀三萬石備荒此開先所不及附錄於
 此

王詔字孟宣其先棗強人洪武初徙縣中詔頗秀美顏
 辭正德五年舉於鄉久之授知定州地當衝要前牧無
 良去者詔示以誠信獷悍遂息蜀人卓某過定遺百金
 奔告詔曰第往尋當有守者至則果然卓謂其人曰何

不攜而去乎曰州人有棄子我公嘗活之我豈忍爾孳
 轉於我公之境哉御史梁某按部猝入獄惟二囚繫焉
 因登上考擢開封同知會朱仙鎮盜起陷尉氏詔往擊
 以計捕首虜於扶溝執訊以還嘉靖十七年河決金相
 寺口水在地上一丈餘議者謂自孫繼口至清河口百
 餘里大興卒塞之須十四萬人領吏六百期六月歲事
 計費且十七萬緡詔是時實注治河往勘曰是在我即
 湛祭以徒四萬塞茭而自蹈橈理捷事三月隄成纔佐
 吏數十算九千七百餘緡績上賜秩視從四品以母憂
 歸比服除日吟嘯繙書帖泊如若忘其嘗仕者詔工五

言詩與劉天民齊名邊貢稱兩生俱俊傑者也在京師
 交於何景明有句云雨雪逢人即江湖問客星為時所

傳誦 據李攀龍王公墓誌銘

谷繼宗字嗣興號少岱濟南衛人幼好學家貧嘗走寺
 廟撥爐灰取遺炷其母棺為一束然以照夜讀舉正德
 八年鄉試嘉靖五年成進士終宜興知縣繼宗嘗以積
 憂而瞽避人依章邱李開先章邱士人爭攜酒殺為之
 主居九十日作詩數百篇贈開先長律百七十句雖有
 目者檢頁書為之不能及其詳雅後遇良醫刺之復明
 其詩集崇正十二年燬於火 據舊志及開居集

按列朝詩集云歷下有劉汝松谷繼宗者皆舉進士有詩名谷亦能填詞而詩俱未工又云嗣興富於篇什以倚待立就為能故可傳者絕罕

又按谷嗣興撰趙繼本墓碑署少岱野史谷蘭宗嗣興而舊志俱作繼宗或通籍後改為蘭耶要非二人也

李攀龍字子鱗號滄溟世為縣人父寶以貲事德莊王為郎善酒任俠不問家人生產母張夢日入懷生攀龍九歲孤苦學母緝蠶給脩脯晉江王慎中視學山東竒其文首擢之嘉靖十九年舉鄉試第二二十三年成進

士試政吏部文選司二十四年以疾歸益發憤為古學文自西漢詩自天寶而下不以汚豪素二十五年入京師充順天鄉試同考官簡拔多竒士二十六年授刑部廣東司主事歷負外郎山西司郎中有邊將觸法不至死者柄臣子銜其不賂必欲置諸辟攀龍力持不可得末減其人卒自奮功名致大帥三十二年出為順德知府攀龍嫉當世流俗之論以為文士無所短長思以經術緣飾吏治有所興除務便民順德故有牧馬場民久耕業其中共繇賦而監司誤以為營馬牧地歲增賦至三千金攀龍請悉蠲之將作所徵順德視正定大名諸

旁郡攀龍以為郡故陋貧民不當他郡比請裁其費比正定十之三又留永濟倉粟無灌輸京師以餉戍卒增設永年縣傳於沙河邯鄲界中寬二邑力移通判鎮鉅鹿官亭以扼盜衝移巡檢黃榆嶺為晉趙關前後請白於臺得報可滿三歲擢按察副使視陝西學政其鄉人東阿殷學為巡撫以檄致攀龍使屬文攀龍不憚曰副使其屬學政非其屬也且文可檄致耶會關陝地裂後數動搖心悸念母老上疏乞歸吏部惜其去特請予告故事外臣無在告者獨何景明前亦以副使予告蓋異數也歸則構一樓鮑山華不注間曰白雪樓居之郡守

以上詣謁輒謝病造詣數四終不一見亦無所報以是得簡亢聲家居將十年隆慶初用薦起浙江按察副使二年遷叅政奉表入賀道遷河南按察使攀龍至是摧亢為和賓客亦稍稍進無何以母喪歸哀毀致疾逾小祥暴心痛一夕卒年五十七攀龍始官刑曹與李先芳謝榛吳維嶽輩倡詩社王世貞初釋褐先芳引入社遂與攀龍定交明年先芳出為外吏又二年宗臣梁有譽入是為五子未幾徐中行吳國倫亦至乃改稱七子七子之名播天下擯先芳維嶽不與已而榛亦被擯攀龍遂為之魁其詩格高峻與世貞名相匹天下亦並稱王

李獨為文及樂府多所摹擬頗為世所挾摘子駒字千里號松盤歲貢生世貞謂其博學能文章有父風據明史及

墓誌銘傳并青門麓葉

許邦才字殿卿其先棗強人五世祖伯成遷於縣父鏊字待時府學生因母疾究方書疾良已邦才少讀書城南山中舉嘉靖二十二年鄉試第一與李攀龍殷士儋遊詩風格近攀龍而無客氣或以為溫厚過於攀龍初知趙州有裝橐將置而去者妻孟叱而擲之無何調永寧行萬里無難色題詩山家藹惻得風人之旨遷德府中官某獄又有餉珠珥於孟者孟曰安用此

糞土加諸首豈以為有廉吏未必有廉婦乎四十二年

補周府左長史加四品服俸久之卒子復府諸生據列朝詩

集滄溟集黔書

潘子雨字潤夫嘉靖二十二年舉人與李攀龍同時而

為詩自盡其才王世貞謂歷下詩人各騁於康莊之途

而無犯轍讀潤夫詩者知為潤夫詩也由知縣仕至行

太僕少卿有政聲弟子震莘縣訓導亦能詩據弁州四部葉及舊

志

張弓字希仲號月梧少為諸生有名舉嘉靖二十五年鄉試第五久不第授淮安通判以才稱同官忌之為下

石罷去歸則杜門守一編吟詩自娛長吏造請皆稱病
不見人以此高之

據月梧集序

王大儒字汝為舊志載其詩二首甚有奇氣

據舊志

按舊志無文苑傳而有詩人一門僅列姓名及所
著集而已未為立傳也所列唐崔融宋李冠李格
非李芝李清照辛棄疾呂頤浩元潘昂霄張起巖
明邊貢劉天民王詔陳軫張弓谷繼宗范瑟金城
李攀龍許邦才光廬任登瀛潘子雨潘子震劉遷
張邦基薛照劉亮采劉勅共二十七人今於其卓
卓者皆為之傳或見別傳或見藝文考而張邦基

薛照事少無所附舊志云邦基有歷下八景詩照

擅臨池之業亦能詩又舊志不列於詩人而附綴

一二語於選舉條下者進士則方守地云能詩文

歲貢則董光馬一乾皆云能詩趙克塾云能詩文

張夢兆云博學能詩精天文陳彥劉遜楊衍嗣皆

云能詩選貢賈嗣照云有和陳方伯落花吟三十

首王德璋云能詩文監生則李化魯云能詩劉謙

光云博學能詩文共十四人聊附見於此

又按宋仲良山左明詩鈔所選歷城人舊志不言

其能詩者又有封術于達正楊謹薛耒張玉珍其

詩皆佳附記於此

國朝

王革字秋史號蓼谷其先臨山衛人父鉞官江南上元後衛守備始徙於縣革性孝好讀書負才落拓視鄉里人無當意者鄉里人羣起而譟之自信乃益堅德州田雯過歷下見其詩物色之遂補諸生雯稱於巡撫張鵬延見講布衣之好顧終以坎壈而詩益骯髒有奇氣所居草堂為明大學士殷士儋別業在望水泉上頗擅水樹之勝革吟哦其間有黃葉林間自著書句新城王士正絕愛之呼為王黃葉名藉甚嘗曰吾受知於新城

州兩先生而與蓮洋為友雖不遇何傷蓮洋謂吳雯也康熙四十五年成進士例當作縣令以母老就成山衛教授年已五十餘矣成山瀕海僻陋革載書往集諸生日夕講論人始知學居歲餘以道險難迎養投牒歸白頭侍母孺慕若少時人尤加敬焉某年卒年如干革詩本性靈而慷慨悲歌一往蕭槭亦善運故實刻於文登于氏文雅潔有義法駢體尤工手定四巨冊格在其詩之上惜無為刊行者

據古懽堂集及隱拙齋集

王經國字子綽歷城人少孤居喪動依古禮以五經試有司學使周龍甲拔置第一年二十餘即志洛閩之學

以主敬為宗盛暑衣冠雖燕居亦終無跛倚丁巳歲試
食餼越明年卒年僅三十六所著詩古文辭其友王革
編為葭濱遺藁六卷付其子青藏於家府志

韓毓桐字元卿少有聲諸生中工詩居近五龍潭築龍

潭書屋日吟哦其中尤長於畫蘭每醉後潑墨淋漓見

者莫不詫為神妙有遺詩數卷子章濬縣知縣賈振基採訪

董行已字大來縣諸生明陝西布政使元學裔孫工畫

雁與韓毓桐畫蘭齊名人謂之韓蘭董雁所居數椽秋

雨時滴漏滿室晨炊不舉與其妻各戴一席相對吹簫

以為樂張廷棟採訪

朱綱字子青宏祚子有雋才自經史至天官壬遁之書

無不研究尤致力聲詩與王士正朱彝尊相切磨被父

命至都下未嘗遊貴者之門所交皆清望有文者故其

詩亦如寒素書生築室章邱之明水曰橡村饒水竹之

勝四方名士履交趾錯觴詠無虛日宏祚卒河上扶櫬

歸又喪其母時兩弟皆遠宦綱獨瘁於湯藥既葬而病

援例候選主事卒年三十八子崇勳字彝存由諸生例

貢成均母喜奉佛崇勳先意承志晨起必誦金剛經數

遍延淄川張元教子弟三十餘年作詩與元齊名綱又

有族子懷樸令昭據王士正墓誌銘及朱彤錄送

懷樸字素存弱冠食餼好結交修文酒之會日課一詩
 雖有事不廢巡撫李樹德與酬和病中成桐社詩百首
 見者不知其病也慷慨好義士大夫及豪俠市僧緇黃
 花門之徒無不知朱公子者詩清麗有山民集朱曾裕錄送
 令昭字次公生數歲知聲偶為詩自闢生奧往往似李
 賀倡柳莊社與淄川張元膠州高鳳翰義烏方起英輩
 為忘形交餘子不與輕接人呼曰狂生書法宗唐人左
 右手皆能為畫亦有格性通脫不問有無嘗囊數千金
 遊吳下不一月立盡鄉人有為福建大吏者招遊乃自
 挾資以往贈遺無所受曰吾此來為噉荔枝江瑤柱無

意作茂陵劉郎也歸則家益落而意氣自如由監生捐

授州同職卒年四十一

朱攸錄送

會傳字式魯懷樸孫也出嗣温州知府燕弱冠補諸生
 薄時藝不讀而試輒冠其偶好為詩尤愛李賀温庭筠
 時慕倣之灤源山長傳王露桑調元皆謂一時無其匹
 也酷嗜飲一日不持杯勺則奄然若病醉輒嫚罵時士
 無足當其意者乾隆二十一年舉鄉試會試屢不第益
 酒於酒得病知不起檢篋中詩讀一過輒焚之至焚竟
 而死年四十有五同上
 劉伍寬字蒲若號此亭其先觀城人父國恩歲貢生遷

於縣伍寬少聰穎年十二日成八藝十八歲巡鹽御史
 劉灝觀風取第一招入署讀書補諸生名大噪鄉試數
 薦不遇雍正七年年五十始拔入成均為詩力追眉山
 敏捷不屬草嘗觀劇京師人皆擲金為纏頭贈伍寬取
 紙扇十餘柄各予一絕句皆肖其音貌曲未終而畢一
 時傳為美談性孤峻意不可一世而家貧無恒產并日
 而食泊如也新城王士正子姓赴試俾主伍寬家且曰
 劉君高士又能詩得款接為幸勿厭所居之偏仄耳其
 傾慕如此灝卒京邸伍寬感知已千里臨其喪著叩扉
 集以哀之又走博山乞趙執信志其墓晚年檄取選教

竟不就年六十七卒

鄭銘採訪

田澐字露湛居明湖側授徒食貧與劉伍寬相倡和詩

亦新逸有遺稿三卷以諸生終

劉士愚採訪

宋云鈺字凝西其先章邱人祖某徙於縣云鈺篤學而
 數奇年二十七始補諸生康熙五十年鄉試已擬第三
 人移置副榜五十六年復擬第一而索二三場卷不得
 其為制藝取法甚古請業者趾相錯於門拾其唾餘皆
 取高第而云鈺無所遇性簡峻座主陳世倌巡撫山東
 某役不法將重懲役持多金乞為緩頰却之曰此非讀
 書人所為也年八十二卒門人私謚曰文節先生

鍾勳採訪

張文箕字維南縣諸生高才有盛名客游京師安溪李文貞公見其文亟稱之其所刻稿半文貞評次又為納監就試順天卒不遇而襟抱蕭散雖坎壈終身洒如也年六十一卒有肖巖詩集如干卷

申士秀錄送

歷城縣志卷第四十終

歷城縣志卷第四十一

列傳七

忠烈

國家於前代殉難諸臣建祠贈諡褒揚至矣當修明史時復

特詔史館直書其事無所避忌蓋我

朝仁厚開基天地同量抗命者皆得垂名竹帛久而彌光

非僅區區載於志乘而已崇正十一年十二月

大兵略地至濟南布政使張秉文等分門拒守十二年正

月二日城潰秉文等死之其鄉官士民亦多死者舊志

作於十三年故載之特詳又前史所載死節死事代有其人予故摭錄舊志益以見聞所及作忠烈傳

漢 吳子蘭歷城人獻帝時為將軍帝惡曹操無君董承受密詔討操子蘭與承合謀謀洩為操所殺舊志

按吳子蘭事在建安五年見蜀志先主傳其為歷城人未知舊志何據舊志又云子蘭墓在城南完備山亦從未見於他書

唐

羅石頭齊州人齊王祐國平陵貞觀十五年反募城中

男子年十五以上悉發以築堞浚隍繕甲兵人惡之皆夜緝亡去石頭數祐罪以刀直前刺祐不克殺之詔贈

亳州刺史見唐書

高君狀齊州野人齊王祐引騎徇邑聚君狀曰上親平寇難土地甲兵不勝計今王以數千人為亂如一手搖泰山又如君父何祐擊禽之媿其言不能殺詔擢榆社

令同上

房繼伯者於齊王祐之反據縣不從抗表以聞太宗勅曰齊州平陵縣百姓爰自隋末以至於今常懷忠誠不從寇亂宜加優獎以旌義烈其縣可依舊置改名全節

太平寰宇記

按房繼伯不見於唐書惟見於寰宇記及齊乘舊志據齊乘采入齊乘又有李君求者即君球之訛

已別見

羅士信齊州歷城人隋大業時長白山賊王薄唐書作簿左

才相孟讓攻齊郡通守張須陁率兵擊賊士信以執衣年十四短而悍請自效須陁疑其不勝甲少之士信怒被重甲左右韃上馬顧盼須陁許之擊賊濰水上陣纔列執長矛馳入賊營刺殺數人取一級擲之承以矛戴而行賊皆貽懼無敢亢須陁乘之大破賊士信逐之北

每殺一賊輒劓鼻納諸懷暨還驗以代級須陁歎伏遺

以所乘馬凡戰須陁先登士信副以為常煬帝遣使慰

諭又圖須陁士信陣法上內史後須陁為李密所殺士

信與裴仁基歸密署總管俾統所部討王世充身被重

創見獲於世充世充愛其才厚遇之與同寢食後得密

將卬元直等士信稍稍疎斥士信恥與之伍率所部千

餘人降唐高祖拜陝州道行軍總管因謀世充士信行

則先鋒反則殿有所獲悉散麾下有功者或脫衣解馬

賜之士以故用命然持法嚴至親舊無少貸師次洛陽

攻千金堡堡為惡言詬軍士信怒夜遣百人載嬰兒唬

譟堡下詐言東都出奔來投羅總管既而陽悟曰非也
 此千金堡耳因散去堡兵開門追掠士信伏入屠之無
 遺類世充平授絳州總管封郊國公從秦王擊劉黑闥
 洺水上得一城王君廓戍之賊急攻潰而出王語諸將
 孰能守此士信曰願以守士信已入賊悉眾攻之會雨
 雪救軍不得進城陷黑闥欲用之詞色不屈遂遇害年
 二十八舊唐書云王隱悼購其尸以葬諡曰勇初士信
 為仁基所禮及東都平出家財斂葬北邙以報德且曰
 我死當墓其側至是果就仁基墓左葬焉新舊唐書本傳
 崔彥曾嶺南節度使能子也咸通初繇大僕卿為徐州

觀察使曉律令性卞急為政剛猛徐軍素驕而彥曾長
 於撫民短於治術軍士多怨之初蠻寇五管陷交趾詔
 節度使孟球募兵三千往屯以八百人戍桂林舊制三
 年一更至期請代而彥曾親吏尹戡徐行儉貪不恤士
 乃議稟賜之請無發兵復留屯一年戍者怒殺都將王
 仲甫脅糧料判官龐勳為將取庫兵剽湘衡虜丁壯合
 眾千餘北還自浙西趨淮南達泗口所過先遣俳兒弄
 木偶伺人情以防邀遏彥曾命牙將田厚簡慰勞而用
 都虞候元密伏甲仗出館擊賊勳遣吏給言士思歸不
 敢遏請至府解甲自歸彥曾斬其吏勳陷宿州發廩錢

募兵亡命者從亂如歸船千艘與騎夾岸謀而進彥曾料丁男乘城或勸率衆奔兗州彥曾曰我方帥也奉命守此惟有死爾斬議者一人號於衆俄而勛傅城城中大霧如墮彥曾悉誅賊家屬勛衆四面起壙入囚彥曾大彭館有曹君長者說勛曰貴者不並處今朝廷未以留後命公蓋觀察使存爾勛乃殺彥曾於寢自監軍使逮官屬皆死始彥曾治第鄭州引水灌沼水十步忽化為血署張佛筵液蜜為人一昔鼠齧皆斷首徐有子亭下瀦水為沱彥曾導清河灌之鐫石龍首注溜葺以屋徐人謂屋覆龍於文為龐清河崔望也為吞噬一贈刑

右見函山文集

傅莊土地祠碑

嘉靖二十四年季秋

傅氏有大聚焉處歷城東可一舍藩而入海者之周道視聚則左將三里聚之人未菽藟於道上舉趾終畝偃語相望見昏暮往來者之疲飢渴凶旱流移者之轉溝壑也莫不愀然自失懼不免是因以作苦卒歲冀不逮荒饉之厄近聚亦多饒沃然少媮情即成功後之凡有秋輒假所懸之役車出聚而聚之婦子已含鼓游嬉滿閭閻矣文聚者勒氏梁氏嘗以力田起於聚聚內咸長推之則曰吾復見爾含鼓游嬉者之飢渴溝壑也天有

患災神起而捍衛之代紀祀典願爾可自佚怠哉聚舊
 有土地廟石所合也水激雨洩就頽矣廼穀登而求材
 於山急攻之瀕臘以覆絨備鑑然若鑿削者落之日聚
 之方社時也塾有歌豳雅者至大田之次章曰是非農
 夫之慶矣梁氏名福勒氏名宗仁為予言之予為記之
 嘉靖二十四年乙巳季秋既望滄溟子記

右碑在傳莊土地廟內是文不見於滄溟集而玩
 其文義非贗作故錄之

贈翰林院檢討殷君暨配太孺人郭氏合葬墓誌銘

嘉靖
戊午

濟南故處士贈翰林院檢討殷致瑞卒之十八年配封
 太孺人郭氏卒其子翰林院檢討士儋正甫將啟其幽
 扃合葬以其友長史許邦才狀來請誌銘予瞿然曰何
 為至此言無文不遠翰林固斯文之歸也豈其失圖固
 辭正甫復曰不情不信語曰士行不出鄉東人吾獨信
 公故願公之誄也既辭不獲乃誌殷君諱汝麟字致瑞
 別號信軒按殷本成湯子姓之裔後乃以國為氏代有
 聞人不歷詳居武定鄧莊者有斷碑草莽間或稱將軍
 或稱千戶亦不詳其名字世次至從善者於君為高祖
 避元季亂轉徙蜀漢國初復歸武定蓋能立不猥人也

生六子長旺有隱德以子貴贈審理正生五子少曰衡以禮經舉景泰癸酉鄉試第五人初任永平司訓選授經德莊王邸績成得璽書褒嘉進審理正贈封如例任日四十載卒王自為畫像製贊遂葬濟南子孫因占籍歷城審理公亦六子第四曰峻成化庚子舉禮經亞魁文籍甚四方經生師之如靈寶許大司徒誥大學士讚襄垣劉大司馬龍都御史夔皆及門士也濟南治禮者則皆其所出娶武氏生二子長汝鵬次即致瑞君生而穎慧日誦數千言屬對能出奇語審理公獨鍾愛之八歲父母相繼喪審理公亦歿汝鵬則不使就學更尠友

亡飲馬泉未知孰是

靳清濟南人洪武中從軍戍遼東官百戶以陣亡世襲千戶其後有名應選者隨

大兵入關世以功名顯應選子輔官至河道總督有治績

諡文襄

八旗通志初集

按朱竹垞集有知交城縣事靳治青墓誌銘謂先世自歷城徙遼陽即輔之族益証其為縣人矣

卒鎮都指揮

馬斯才百戶

馬虞順百戶

樂賢忠百戶

李季子所鎮撫

秦邦賢武舉

朱廉武舉蓮妖之變諸弁往勦敗岡山死者數人

俱舊志

按明史藁趙彥傳薊州人王森得妖狐異香倡白

蓮教其徒蔓延畿輔山東山西河南陝西四川萬

歷四十二年森為有司所攝越五歲斃於獄其子

好賢及鉅野徐鴻儒武邑于宏志輩踵其教徒黨

益衆天啟二年五月鴻儒反陷鄆城犯滋陽破鄒

滕二縣十一月山東巡撫右副都御史趙彥擒之

伏誅舊志所謂死蓮妖之變者蓋從彥征鴻儒耳

樊應科歷城人以千總從征死於陣事聞贈恤配享張

元戎可大廟

舊志

按明史藁張可大傳可大以登州總兵官勦孔有

德為登萊巡撫孫元化所阻城陷可大時守水城

投繯死賜祭葬予世廕建祠曰旌忠樊應科既配

享其祠是為從征有德無疑也事在崇正五年

寧海王朱常泐性謙和能馭下葬母步送至墓哀動路

人咸稱其孝崇正己卯之變守南城城陷死之

泰安奉國大將軍朱常汴死難

泰安奉國四將軍朱常澆死難

臨朐奉國將軍朱常濬死難

陳載春號澄渠九疇子萬歷八年進士歷官河南副使
天性醇謹所蒞皆有實政家居杜門謝客不預外事嚴
禁家僕橫暴屢薦不起已卯城陷不屈而死年八十八
子太學生樞諸生樟楠孫文煥皆守城

按畿輔通志載春曾官順德府知府

又按舊志選舉附注云樞庠生入監樸厚溫醇善
承親意人樂與交已卯守西南城死難

孫止孝字敬止天啟二年進士由盧龍縣知縣晉戶部

郎尋遷密雲兵備道叅議

大

兵兩薄城皆晝夜宿陣兵輒引去又密計獲謀者韓僧
以忤權貴歸已卯命子建宗率族人守東城捐貲犒師
城陷自縊死兄諸生則孝舉人純孝弟諸生永孝姪惠
宗延宗數人皆與於難

劉勅字君授弱冠登賢書春官十二上不第授富平縣
知縣母卒居廬砥礪名節好著書年八十猶手不釋卷
已卯城陷不屈而死子弟皆被殺

劉檄勅弟也歲貢生授樂亭縣知縣終邳州知州舉鄉
飲大賓已卯死難

穆遠號南陽深之弟萬歷二十二年舉人授直隸元城縣知縣吏議鐫級博學善談論已卯遠守西門獻策當事不納城陷被殺及其子光嗣

按舊志選舉注云穆光允深之子崇正八年武進士本省巡道中軍守備已卯守西城死難

史臣贊其先浙人天啟中恩貢生歷任忻州知州以罪歸已卯城陷被殺子起鳳亦死

劉化光字汝化伯綬子天啟七年舉人候選推官戊寅當事俾練回兵保護西郭植柵挑壕

大兵至率衆拒守已卯城陷死之子漢儀崇正三年舉人

守西城亦死事聞候恤

按明史忠義傳劉化光與子漢儀先後舉於鄉父子俱守城力戰死贈卹有差是化光嘗邀贈卹或作志時未及知耳

賈槐字世蔭希夷子萬歷四十三年舉人已卯糾衆協守捐貲餉卒城陷死

張元英字孟育天啟四年舉人好儲書以經史子集分部獨鍾惺書別貯一笥閉門謝客日焚香點較歲數百卷以為常戊寅守南城倡施布被以恤軍之凍者捐酒食餉戍卒城陷死

嵇巖字珊楓崇正九年舉人戊寅守觀風樓城陷死南城下

胡士傑少好讀書年四十為掾吏勤慎謙和雖案牘紛紜不釋書史子顯宗字昭來崇正三年舉人戊寅守西城出簪珥易蠟百炬以濟軍需城陷父子皆死於難

米嘉珠號玉函萬歷四十三年舉人天啟二年七年兩中會試副榜戊寅守西城城陷投井中死

徐暉吉號羲上天啟四年舉人戊寅守南城城陷死劉汝通號復陽萬歷四十三年舉人戊寅守南城城陷死

丁振字又從崇正六年舉人戊寅守北城城陷死王啟亨元復子萬歷二十四年舉人已卯守城死

張允文歲貢生東昌教授素有文名兩中副榜戊寅守城死

吳安邦字磐石歷任登州鎮總兵官戊寅守北城城陷死

王敬賢號震陽武進士武定州守備致仕家居年七十餘戊寅守北城與吳安邦同死

王允前字丕承年十二值父病禱神借壽為父益算髫年入泮為周廉憲延光所知舉鄉試戊寅守北門城陷

負母至歷山頂遇

大兵母子俱不屈同死

費克謙京營副將戊寅守南城城陷被殺

陳光先衛指揮戊寅署巡道中軍率道丁守城城陷戰於布政司街力竭而死

四城巡守義社生負死者三百五十二人

回兵者皆西關人聞警糾千餘人保護西關陳金兩教長頗有戰績死者二百餘人

楊家寨者城東北楊家莊也莊人環水立寨獨留一徑偽設木砲而別點正砲以禦敵已卯城陷寨猶固守

大兵入寨死者楊卓等百餘人稍西為邊家寨亦稱能守

云以上俱見舊志

按崇正己卯死者自寧海王至楊卓等俱見於舊

志忠義傳舊志又有附注於選舉者吳斗光天啟

丁卯舉人直隸博野縣知縣戊寅死難趙標名斗

光同榜舉人已卯守東城正月二日城陷人見其

死東城下張經崇正恩貢生已卯守北城死江源

長乙亥拔貢生已卯死陳典崇正丙子武舉死西

城并附於此

高思恭字凝止邑諸生崇正己卯城陷知縣韓某議城

守思恭分守北城城破死之

竟其超採訪

按舊志於已卯死事諸人似有載之不盡者今採訪所及僅有思恭一人亟錄之

劉廷寶武生善騎射崇正末盜紛起廷寶練鄉兵保其村坊盜不敢近官知其勇俾為練總捕賊於莠山之南格鬪峻澗中幾毀賊巢會同伍有為賊內應者遂遇害部下卒李浩然被傷匿亂屍中得歸述其事

劉致錄送

李興邦字振宇濟南衛指揮崇正甲申闖賊移明社聞變慟哭易服誓以死殉持刺遍辭所親或以官卑無社稷責勸之曰官雖卑亦官也况世戴國恩敢不盡節遂

不食闖偽權將軍至官司出迎李聞砲聲問故拊牀一

慟而絕

萬菴閒話

按舊志作於崇正十三年而十七年鼎革時事絕不見於紀載惟張爾岐萬菴閒話於李興邦死節事有云偽權將軍至濟南官司出迎於此稍見其槩而葉承宗百花洲傳奇專記李自成偽官刑辱搢紳事頗詳謂四月初六日偽順牌至邱巡撫碎之欲集兵民守城無應者又云巡撫邱按院余皆出城推官鍾知縣朱皆謝事而偽知縣喬茂桂四月初到任偽權將軍郭陞十三日宿齊河十四日

到任居都司署又有偽防禦使丁昌期偽濟南府知府高丹桂偽推官李世顯偽軍糧廳呂陞索德王冊寶不得刑訊梅參將乃得之府學月牙池邊十九日陞去時有戶政府從事張琚者謂之催餉司拷掠宦家子俾助銀其被掠者以萬歷來科目為斷計三十餘家刑具夾拶外有鐵梨花呂公綵紅繡鞋之名及德州謝陞殺偽防禦使閻傑泰安州守將高桂等及蕭趙兩鄉官殺偽防禦使郭都青州殺偽威武將軍昌期等聞之懼甚德州討賊檄至都司劉世儒欲起義誅偽官五月初五日西關失火偽官有備不得施世儒將卒乃橫肆剽掠於城東北諸村而偽官次第逃去孫進士建宗糾眾請推官鍾掌府事知縣朱掌縣事諸王歸府五營兵皆還

國朝

葉承宗字奕繩世次見弟承祧傳承宗少嗜古能文章讀書雖元旦不廢天啟七年舉鄉試七上春官不第益奮力於學問崇正十三年知縣宋祖法屬輯縣志縣新遭兵燹文獻闕如承宗蒐羅佚聞取劉勅舊編更正補綴成十六卷其人物於正史無所遺而近者載之不濫

列女惟錄已旌及死事者裁五十餘人時以為佳史入國朝登順治三年進士授臨川縣知縣值歲祲發廩賑饑所活甚眾大府課吏例視催科定殿最承宗曰此豈有司博上考時耶停徵數月民甚賴之立香楠社課諸生刊其藝之佳者數百篇社士後多知名侍讀李來泰其一也五年冬贛鎮金聲桓為逆攻撫州承宗甫策防禦而守將吳某已應賊城遂破承宗被執逼授偽官不屈賊怒繫於獄承宗仰天歎曰得死所矣至夜自盡時十月初七日也年四十七弟承祧焚其尸而奔告征南大將軍固山額正譚仁泰仁泰以承宗忠烈奏授承祧興

女縣知縣葉氏家譜

德琳按金聲桓以總兵官駐南昌順治五年正月叛時先曾祖諱承善府君為建昌知府方議城守而駐建昌副將王得仁者聲桓黨也聲桓檄得仁起兵為應得仁延府君至其營示以檄府君大驚力陳其不可得仁迫脅之府君罵不絕口得仁怒碎其首家屬遇害者十餘人城遂陷先叔祖爾佳間道奔征南大將軍譚仁泰告變奏授廣昌縣知縣明年三月先祖諱爾傑府君自江南聞變亦奔譚復授餘干縣知縣皆以府君殉難故也然未邀

祭贈今閱臨川知縣葉承宗家傳亦僅授其弟官
 乃知當時軍政旁午殉難者卹典多不及而子弟
 授官實卹典之大者葉之死在是年十月蓋撫州
 至十月始陷耳府君被禍最早死狀尤慘酷不忍
 言云德琳感承宗事因附記於此

徐天平歷城人任温州鎮標左營千總閩逆犯浙隨師
 進勦康熙十五年二月十七日與賊戰於温州大西山
 被創死事聞

賜祭一壇廕一子衛千總表忠冊

按徐天平見浙江通志名宦傳事甚近而採訪竟

無及之者何也

翼殿安字良佐縣人偉幹善射少負志節嘗酒酣撫膺
 曰生七尺軀不能為國家効命疆場甘老死傭保間乎
 應乾隆二十一年武鄉試舉第一選授四川重慶營守
 備乾隆三十一年緬夷逆命調蜀中勁兵從征而殿安
 以材勇應選隨大將軍明瑞摧破緬寨十六所留鎮木
 邦會緬匪大至圍城急而援兵不至叅贊大臣珠魯訥
 死之殿安馳馬陷陣力戰中砲而死

詔卹其家賜祭葬如例廕一子

命史館立傳崇祀昭忠祠

張敬錄送

命

...

...

...

...

...

...

...

...

...

